

ርኢሰ ኢሰያስ ወርኢስ ሺ ጂንፒንግ፡ እት ጠወሮት ዕላቀት ኤረትሮፕ ወቻይነ ህድገው

ርኢሰ ሺ ጂንፒንግ 15 ማዕ ምን ገጽ ምሴ እግል ናይ ሸረፍ ጋሻሁ ርኢስ ኢሰያስ ኣፈወቂ ኩቡቲ ረስምየት ወደ እግሉ።

ዲብሊ እብ ሕሸመት ኣሴራር ወነሺድ ወጠን ኤረትሮፕ ወጀምሁርየት ሸዑብ ቻይነ ለተለ እሕትፋል ረስሚ፡ እግል ርኢስ ኢሰያስ ኣፈወርቂ ወምሰሉ ለጌሰ ውቁል ወፍድ፡ 21 ኢነት መድፍዕ ለክፈ።

ግሪ እሊ ርኢስ ኢሰያስ፡ ምስል ርኢስ ሺ ጂንፒንግ ወርኢስ ውዘረእ ሊ ክያንግን ኣግደ ዲብ ኣደቀቦት ታሪካይት ዕላቀት ኤረትሮፕ ወቻይነ ለረከዘ ህድግ ዋዲ ህለ።

እሊ ክእነ ዲብ እንቲ፡ ርኢስ ኢሰያስ፡ እብ ሰብ ሰልጠት ኤረትሮፕ ወቻይነ እንዲ ተለ ዲብ መዲነት በይጂን ዲብሊ ህለ ሚዳን ‘ትያናንመን’ ዲብሊ ህለ ‘ትምሳል ፍራስ’ ሕቅፍ ዕንባብ ከረ።

ርኢስ ኢሰያስ ኣፈወርቂ፡ ርኢስ ሺ ጂንፒንግ እበ ወደየ እሉ ዐዙመት ረስምየት፡ ምን ዮም 14 ማዕ ዲብ ጀምሁርየት ሸዑብ ቻይነ ዝያረት ረስምየት ወዲ ክምስል ህለ ልትአመር።

ኤረትሮፕ ወጀምሁርየት ቻይነ ረስሚ ዕላቀት ዲብሉማስየት ምን ለኣሰሰ ዲብ ትመጽእ 24 ማዕ 30 ሰነትን እግል ለኣትምማ ተ።


እተ ዝያረት፡ ርኢስ ኢሰያስ ኣፈወርቂ ወርኢስ ሺ ጂንፒንግ፡ ማሌ ለሀ ምሴት ዲብሊ ወደዉ ልቀኢ፡ ዲብ ኣደቀቦት ታሪካይት ዕላቀት ኤረትሮፕ ወቻይነ ወደረ

ዲብ ናይ መንጠቀት ሰላም ወኣምን ህደገው።

ርኢስ ኢሰያስ፡ ዲብ ገብኣት እሉ ዐዙመት ወክቡቲ ናይረት ሐምዲሁ እት ቀድሞ፡ ቀደም 56 ሰነት ዲብ ሰነት 1967 ምስል መልህም እግል ደራሰት ዲብ ቻይነ እተ ለዐለው እተ መደት፡ ቻይነ ናይ ሰልፍ ቅምብለት ነውዮት ለጀረበት እቲ ወክድ ክምስል ዐለ እንዲ ኣሸረ፡ ዲብ ክእነ ላተ መርሐለት ዲብ ቻይነ ጽንሐቲ ታሪካይ በክት ዐቢ ክምቲ፡ ዲብ መደት ንእሹ ለትረከበት ተጀርበት ህዩ ዲብ ሐያቲ ወሐያት መልሂቲ ለሐድገተ ፊቃዶ ቀላል ክም ይዐለት ሸርሐ።

“ረስምየት ዕላቀት ዲብሉማስየት ኤረትሮፕ ወቻይነ 30 ሰነት ምንመ ወዲት፡ “ዕላቀት ክልኢተን ድወል ላኪን ዝያድ 60 ሰነት ለኣዶረት ተ” ለበለ ርኢስ ኢሰያስ፡ ሸዑብ ኤረትሮፕ እግል ሸዑብ ቻይነ እት መደት ናይ ሰለሕ ግድላሁ ለወደየ እሉ ናይ መዕነውየት ወማል ሰዳይት ዲመ ክምስል ኢልትረሰዐ ሸርሐ።

ሐቆ ተኣሰሰ ጀምሁርየት ሸዑብ ቻይነ፡ ለደውለት እበ ኣርኤቲ ሻፍግ ተጠውር እቅትሳድ፡ ዲብ ደረጀት እድንያይት ቅውት ክም ዐቤት ለኣትምበህ ርኢስ ኢሰያስ፡ እተ ሐልፊየ 75 ሰነት ዲብ እድንያይት ሰላም፡ ዐቦት ወእንሳንደት ለኣውፊቲ ዶር ወእጥፍሕተ ለህሌት ኣርደት እት ሸፊሕ፡ እድንያይት ዐዳለት እንዲ ኣሰበቀት፡ ለዲብ ተጠውር ልሄርረ



ለህለየ ድወል ሕርየት ወዐማር እግል ልርከበ እተ ትወድዩ ተእደድ ሐመደ።

ርኢስ ኢሰያስ እንዲ ኣትሉ፡ ዲብ እሊ ልትከለቅ ለህለ ሐዲስ እድንያት ንዝም፡ መጅተመዕ እድንዮ፡ ቻይነ እትለ መርሐለት እለ - እግል ዐማር ወዐቦት ኣደሚ፡ ክምስልሁ መዳለት እጅትማዕየት እግል መትመዳድ ዐዳለት እጅትማዕየት ወቃኑን ዶር ወቁል እግል ተኣውፊ መስኢት ወደማን ክምቡ እት ሸፊሕ፡ ኤረትሮፕ ምስል ጀምሁርየት ሸዑብ ቻይነ ለህሌት እለ መዓወነት እግል ትወቅል ዱሊት ክምተ፡ ጠወሮት ናይ እለ እስትራተጅያይት ዕላቀት ሸርከት ህዩ፡ ዲብ ኤረትሮፕ ወጠንያይት ናይ እቅትሳድ ወእጅትማዕየት ዐማር እግል ተኣክድ ለትወድዩ ጸገም ለሰድዩ ክምቲ ወደሐ።

ርኢስ ኢሰያስ እንዲ ኣትለ ምስል ጀምሁርየት ሸዑብ ቻይነ ለጸንሐት ዕላቀት እግል ዳይመት እስትራተጅያይት ሸራከት ዲብሊ ትወቅለት ደረጀት እንዲ ጠወረት፡ ለልትሐመድ ተቅዩር እግል ተኣድምን፡ ሕሰብ ለህለ መጃላትል ብንዩት ትሕትዩት ጽርግያታት፡ መከረዩ ዋያራት ወገበይ ባቡር፡ ኣብያት ሰከን፡ ጣቀት፡ ብንዩት ከዛናት ማይ ወተጠውር ዘበናይ ከደማት፡ ኣበርካት ወጠወሮት እተይ ሐርስ ወሐዋን፡ ዐማር ርዝቅ ዓሴ ዋወር ናይ ምድር፡ በሐር ወዐስተር ከደማት መዋሰላት ምስል ዘበናይ እትሳላት፡ ጠወሮት መቅደረት ኣዳም፡ ክዳማት ዓፍየት ወስያሐት፡ ዲብ ተዕዲን ለህለ ጌዳን ለኣለቡ ኣርዛቅ፡ ሳፊ ወዘበናይ ከደማት ባንክት፡ ትጃረት ወሰናዕት፡ ክምስልሁመ ናይ ደሐን ወመዳፊዕት መቅደረት ክም ከምክም ሐቆለ ፈሰረ፡ ለከሰሶም ጀሃት እንዲ ተዐንደቀው ለለኣደሚዕ ዶር ጀላብ እግል ሊደው ርኢስ ሺ ጂንፒንግ መምሬሕ እግል ለሁብ ትሐሰቡ።

ርኢስ ሺ ጂንፒንግ እብ ጀህቲ፡ ቻይነ እግል እት ትጠወር ትመጽእ ለጸንሐት ዕላቀት ምስል ኤረትሮፕ፡ እብ መጅብ ረዩም ለትኣንጽር ስትራተጅያይት ዕላቀት ክም ትገንሐ እት ሸፊሕ፡ “ቻይና ናይ ኣማን መስንዩት ኤረትሮፕ ተ” ቤለ።

እትሊ ፈርህት ወረብሸት ለበዝሐ እቲ ተዩልል እድንዮ፡ ድቅብት ዕላቀት ኤረትሮፕ ወቻይነ፡ እግል መስለሐት ክልኢተን ድወል ሌጠ እንዲ ኢትገብእ፡ እግል ሰላም ድወል መንጠቀት ወዐዳለት ክም ትከድም ሰእዩቲ ለሸርሐ ርኢስ ሺ፡ ዐዱ ምስል ኤረትሮፕ ለህሌት እለ ስትራተጅያይት ሸራከት ክም ተኣተርደ ኣከደ።


ርኢስ ሺ እት ደንጎቤ ዐዱ

እግል ኤረትሮፕ ምን መደት ረደም እንዲ ኣንበተት ለትብበዐ ሕር ሰያሰት ካርጅ ክም ተዐጅብ እት ወዲሕ፡ እግል ኤረትሮፕ ለትትወጤ ሰለል ዐማር ክም ተኣደድ ኣፍህመ።

እሊ ክእነ ዲብ እንቲ፡ ርኢስ ኢሰያስ ወርኢስ ውዘረእ ሊ ክያንግ እተ ወደወ ጀልሰት፡ እብ መናሰበት መትኣሳስ 30 ሰነት ዕላቀት ረስምየት ኤረትረየ ወቻይነ፡ ከሊመት ኣሰናዩ እት ለኣልፍ፡ ምስንዮት ኤረትሮፕ ወቻይነ፡ ዲብ እስትራተጅያይት ዕላቀት እንዲ ተዐዲት፡ እብ መጀባ ህዩ፡ መትሰዳዳይ ክልኢተን ድወል እንዲ ትጠወረ ምን ረኣ ርዮሕ ክም ተ ሸርሐ።

ርኢስ ውዘረእ ሊ እንዲ ኣትሉ፡ ቻይነ ዲብ ኤረትሮፕ እት ጠወሮት ለትትጀደድ ጣቀት፡ እቅትሳድ ዲጂታል፡ እቅትሳድ ሊናይ፡ እቅትሳድ ኣክደር፡ ክምስልሁመ እት መጃላት ዓፍየት፡ ተዕለም፡ ጠወሮት መቅደረት ኣዳም፡ ተዕዲን ወሰናዕት ትወድዩ ለህሌት እስትሰማር ዝያደት ክምስል ተኣተላልዩ ለናይ ዐማር በራምጅ ህዩ፡ ናይ ወቅት ኤታን እንዲ ፈግረ እሉ፡ እት ቀበት ሐቲ ሰነት እት ፍዕል ለትተርጀም ምስዳር እግል ትትነሰእ ክም ተ ሐበረ።

ርኢስ ኢሰያስ ህዩ፡ ኣፍሪቀ ግሪ ታርፊት እቡ ለህሌት ኣግደ ኣሰባብ፡ ምን ከርስ ልትሐንፊል ለህለ ኣርዛቅ ጠቢዐት ሕኔት እንዲ ትሰነዐ ክም ታመት ብዳዕት፡ እብ ዋራዩ ኣሰክ ተሰዲር ገይሰ ምን ክም ህለ እንዲ ወደሐ፡ ምን እትለ መደት ጎነ ልትረኢ ለህለ ተሐድያት ዐባዩ፡ ናይ ሐለት ወከርዶን ስትራተጅየት ድወል ምውዳቅ ጸኣይ ክም ተ። እሊ እግል ልጋብህ ህዩ ለድወል ምስል እግል ልብጠረ፡ ክም ለኣትሐዝዮን ሸርሐ።



ቅየም ሕር ኤረትርዮ

1, ከዋ ሕር

ላሊ ሐቲ በይሐት ወክልብ እት ዳምቀት በርህት ወራሕ ትከበተው። ለክልብ ሰኒ ርሽድ ወገኖብቴ ራውየት ሰበት ዐለት፡ በይሐት ተዐጀበ ወእብ ሰበት መናበረቱ ትሰላለዩ። ክልብ ምስል አዳም ክም ነብር ወሽቅሉ ህዬ ሐሽ በዕሉ ዕቅበት ሌጣ ክምቲ፡ ወበዐሉ ሰኒ ክም ራዕዩ ወለአበልዑ ሽርሐ እሉ። ለኖሱ እንዴ ትፈረረ እብ ንዕዮ ለነብር በይሐት፡ እብ ቀላል ወሰኔት መንበረት ክልብ ትረየሐ ወክምስልሁ ለመስል ሽቁል እግል ልሕዜ እሉ ህዬ ረምቀዩ። እብ እንዴ አተፈገው ህዬ መዋ-መጦር አድሕድ አስክ መዲነት እትገይሱ፡ በይሐት እት ወሪድ ክልብ ሽንርብ ረአ ወናይ ሚ ክም ተ ትሰላለዩ። ህቱ ህዬ ናይል እንዴ ተአሰረ እብ ለልውዕል መዕጸይት ክምተ ሽርሐ እሉ። ሐቅ እሊ በይሐት እንዴ ደንገዳ፡ “መለህይ መንበረትክ እግልኩ፡ ምን ጥዕም ሕበዘት ምስል ስልሰለተ ይብሰት ጭራም ምስል ሕርየተ” እንዴ ቤለዩ ከትሀርበበ ምኑ። (ምን አድጋማት ኤዞፕ)

እትሊ ለህሌነ ዲቡ ዘበን ለገብአ ሽዑብ ወወጠን ምን ድዋራቱ እንዴ ትፈንተ እግል ለአምጽኡ ለቀድር ተጠውር ሰበት ኢህሌ፡ ናይ እቅትሳድ፡ ተጃረት፡ ዓዳት ወተክኖሎጂ ተጠውር ዕላቃት አድሕድ፡ መትዓዋን ወመትባዳል ምህምቲ። ምናተ እት ዐለምን ዲብ ፍንጌ ጥወራም ወልሳዕ ዲብ ተጠውር ለልትረከዮ ሽዑብ ለጸንሐት ዕላቃት፡ ክም አግደ ዲብ አንተህዞት ለረከዘት ለኢትዝመት ዕላቃት ተ ለዐለት ሌጠ እንዴ ኢገብእ፡ ዲብ መጃላት ሲያሰት ወእቅትሳድመ እስትዕማር ለቡ አግቡይቱ ለዐለ።

እብ ሲያሰት ሐክል ሕበዘት ምውዳቅ ጸሓይ ለልትመረሐ ናይ ኖሰን ሕርየ ለአለበን፡ ናይ ሕሰር ቀበት ዐድ ምራደን፡ እብ ውላድ ጋነ ለልትሐደድ ድወል ክም መስል ሽርሐት ልትቀደር። ለሕበዘት እብ ስሜት ራድኢት ወመትዓዋን፡ ክምስልሁመ እብ ገበይ መአሰሳት ማልየት ክም ባንክ እዲኡ አይ ኤም ኤፍ፡ ለልትህየብ እትገብእ፡ ለሐክል ህዬ ምስሉ እንዴ ትጸበጠ “እሊ እግል ትርከብ እሊ ውዲ!” ለልብል ዲብ ቤትክ እንዴ አተ አማውር ለልአሰድር ጨቅዋ ወአትፋርሆት ቱ። እትሊ ወክድ እሊ ህዬ ለደቅዋ ምኑ እንዴ ሐልፈ፡ አሳሲያይ ዐዋዲ ወሕሽዋታት ሙጅተማዕ እግል ደመሮት እብ ስሜት ደያነት፡ ናይ ብሕቶት ደያነት ምን ዐዋዲ ወለመድ ሽዑብ በራ፡ አስክ ህዳይ እናስ እግል እናስ ወእሲት እግል እሲት እብ ቃትን እግል ልትሰማሕ ደቅዋ ለወዱ፡ ኢትከበተዉ ምንገብእ ረድኤት ወሰዳይት ዲብ መዕነተ ክም ኢለውዕሉ ዲብ ድወል እንርእዩ ለህሌናቲ።

እት ክእኒ ለመስል መሲር እዲነ ምን መተንካብ ዲቦም ሕር ላቱ ሲያሲያይ ወእቅትሳድያይ ከዋ እንዴ ጸበዋክ እግል ትሄርር ቀራር ወሰጃዕት፡ መትሐማል ወሰባተት ጠልብ። ሀደፍ ሽዑብ ወደውለት ኤረትርዮ እብ ሕርየት እግል ተርጀሞት፡ መልክ በራምጅክ ወቀራራትክ ግብአት ለትሐዜ። ድምንት ወታመት ሕርየት እግል አከዶት ለትበገሰ ወጠን፡ እግል ልሳድፋ ለቀድር ዐዳዋት እብ እንዴ ኢትደንግጽ፡ እት ሕር ከዋ እብ ሰባተት እግል ትሄርር ለትሐዜ። እት እዲነ ዕዉታም ሙጅተማዕት እብ ለጸብጠዉ ከዋ እንዴ ሰብተው ለልሄርሮ እትገብእ፡ ሕርየቶም ለልኢዘቡ ላኪን እግል ክሉ ፈሸል ወመትደንጋር፡ እግል ለኢገብእ ደቅዋ ወአትፋርሆት በህለት እግል እስትዕማር ለጀግሐው ቶም።

ሕርርት ኤረትርዮ፡ ድወል እዲነ ድቁባት ልግበአ ወድዒፋት፡ ርዙቃት ልግበአ ወሓግላት፡ ሲያደት ኖሰኖሰን እንዴ ሐሸመዩ፡ እብ ሱዊት ሽርክኖት እግል ልንበረ እንዲኢኮን ናይ መልክ ወገብር ዕላቃት እግል ተህሌ እለን ለኢትትከበት ደውለት ተ። እብ ሰብብ እሊ ናይ ዶሉ መሻክል እግል መትዕዳይ እንዴ ትቤ ዲብ ሽረክ ሐክል ሕበዘት የአቴት፡ ምን ገዜፍ ገብር፡ ቀጠን ሕር ተ ለሐራት። ሰበት እሊ ዲብ ቀራራተ ወሕርያነ እንዴ አተ ለለትፋርህ ወእግል ልሕከመ ለቀድር ይህላኒ። ሕር ሕርየ፡ ሕሩር ከዋ በጋእ ምር ምን ለልሐብን ሕሽዋታት ሕርርት ኤረትርዮቲ።

ልጅነት ቅሰም ጀሪደት

ኤረትርዮ፡ ሕርየት

ክል አርቡዕ ለትጠ'በዕ ጀሪደት

መዳልያይ፡-

- መሐመድ እድሪስ

ሊዩአውት ወአርተዖት

* ዘህረ ዐሊ

* ፋዋን አድም

ተለፎን፡ 121797/07121322

ፋክስ፡127749፡ ዕ.ሲ.ቡ፡ 247

ተውገሐ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሲ.ቡ፡ 1284

ዲብ ብሪጣንዩ፡ ኤረትርዮን ሰካን ለንደን በርናምጅ “አንበልብሊ በንዴራይ” አዳለው

ዲብ ብሪጣንዩ ኤረትርዮን ሰካን ለንደን እብ መናሰበት ሳምን 32ይት ዓኢድ ህርየት በርናምጅ “አንበልብሊ በንዴራይ” አዳለው።

ለእሕትፋል ሕርየት እግል አግመሎት መንዴረት ኤረትርዮ ምስል ብዕድ ገባይል እግል አትአመሮት ለአመመ በርናምጅ፡ ለምዋጥኒ፡ መንዴረት ኤረትርዮ እት ረፍርፎ ወእብ መንዴረት ኤረትርዮ ለትሰርገ ዐጀሳት፡ መካይን ወአውቶቡሳት እንዴ ትጸዕነው እብ አግደ ሽዋርዕ መዲነት ለንደን ትጀወለው።

ለበርናምጅ ዲብለፈነት ዕምር ለህለው አምኦት ምዋጥኒን ለሻረከው እቱ ገብእ እት ህለ። ዲብድ አንገብ ምሻርከት፡ ዲብ



መንገአት ሰፋረት ኤረትርዮ እንዴ ተአከበው፡ እግል ዓዳት ወቅዩም ሽዑብ ኤረትርዮ እብ ሽፊሕ ሐልየት ትፋገወው።

ሰፊር ኤረትርዮ ዲብ ብሪጣንዳ

ወቅብለት አየርላንደ አሰይድ እስቲፋኖስ ሀብተማርያም ህዬ፡ ምስል አንፋር ሰፋረት ወመስኡሊን ጃልያት እንዴ ገብአ እግል ምሻርከት አሰናይነ ቤለ።

ካስ “ህያብ ሕርየት” እት ሳዋ ከብቴ ናይረት ገብአት እግሉ

እት ዮም 24 አብራል፡ ምን ድፍዓት ደንደን ለትነሰአ ቃሊ ህያብ ሹሀደእ እንዴ ረፍዐ ለትበገሰ ካስ “ህያብ ሕርየት፡ ማሌ 14 ማዮ ምን እምሐጀር - ምዴርየት ጎሉጅ እንዴ ትበገሳ፡ መዲነት ተሰነይ እንዴ ኬደ ምን ገጽ አደሐ እብ ገበይ ተመራት ሳዋ እተ አተ ዲቡ ወቅት፡ ከብቴ

ናይረት ገብአት እሉ።

እብ አሴራር ናይለ ዕንዳቄ ታመት ለትዐንደቀው አንፋር መርከዝ ተድራብ ክድመት ወጠብ ለትነወረት መናሰበት ህዬ፡ ሙዲር ዓም ቅሰም ዓዳት ወርያደት አቅሊም ጋሽበርካ አሰይድ እድሪስ ሳልሕ፡ ለካስ እግል ቃእድ መርከዝ ተድራብ ክድመት ወጠን ሳዋ

ኮሎኔል ደበሳይ ግዴ ሰለመዩ።

ሐቅ እሊ፡ አህዳፍ ሳዋ ለሽፊሕ ለብብስ ለላብሳም ወለት ወሕጸን ሽባብ እብ ሕሽመት እንዴ ረፍዐው፡ እተ አንፋር 35^{ይት} ደውረት ክድመት ወጠን ልታከው ዲባ ለዐለው አካነት ክም በጽሕ፡ ኮሎኔል ደበሳይ ግዴ፡ እግል ዝክረትላ ህያብ ሹሀደእ እንዴ ረፍዐ ለመጽእ ካስ ለትዳሌት “ሽምዐት ሕርየት” ክም አብረሃ እተ አሰመዐዩ ከሊመት፡ አህምየት ናይለ እብ ውካለት ካስ ትገብእ ለህሌት ዝያረት ህያብ ሕርየት እት ወዴሕ፡ እግል ከሉም ካሌት ጸሓይ እንዴ ከህለው ህያብ ሹሀዳሆም ለትከበተው ሐመደ።

እት ደንጎቤ ቃእድ መርከዝ ተድራብ ክድመት ወጠን ኮሎኔል ደበሳይ ግዴ፡ ለካስ እግል ሙዲር ምዴርየት ፎርቶሳዋ አሰይድ አብብከር ማሕመድ ሐቀለ ሰለመ፡ አስክለ ተ'ሌ ሄራፋ ትሳርሐ።

ማሌ ላሊ እት ኤረትርዮ አንቀጥቀጢን ትሰመዐ

ዲብ ኤረትርዮ 4.7 ፊክተር ለቅያሱ እርዕደይ ምድር ክም ሳደፈ፡ ውዛረት ጣቀት ወመዓድን እግል ኤሪነ ሐበረት።

ለማሌ ለሀ 15 ማዮ ሳዐት 10:05 ደቂቀት ምን ፈሮ 15

ኪሎ ምትር ዲብ እንክር ምውዳቅ ጽሓይ ወምን ዐዲ ቀይሕ ህዬ ሐድ 38 ኪሎ ምትር ዲብ እንክር ግብለት ምውዳቅ ጽሓይ ዲባ ህለ ባካት ሰንተሬ፡ ዲብ 40 ኪሎምትር ቀሪነ ለሳደፈ እርዕደይ ምድር፡

ዲብ መዳይን አሰመረ፡ ባጼዕ፡ ዐዲ-ቀይሕ፡ ወሰንዐሬ ክም ትሰምዐ ተቃሪር ለሐብር።

ለእርዕደይለ ምድር፡ ዲብ አዳም ወማል ለአጅረየ መደረት አለቡ።

ፖሊስ ተራፊክ አቅሊም ዐንሰቤ ተዕቢአት ወዴ

ፖሊስ ተራፊክ አቅሊም ዐንሰቤ ዲብ መዲነት ከረን - እግል ደረሰ 18 ናይ መአንብታይት ወምግባይ ደረጀት፡ ዲብ ቀዋኒን ተራፊክ ወሰብብ ከዩዱ እንዴ ረከዜ፡ ምን ዮም 8 አስክ 12 ማዮ ናይ ተውዕያይ ሰሚናር ወደ።

መስኡል ተራፊክ ሚጀር መሓሪ ኪዳኑ ደዓም ዲብ መዲነት ከረን፡ መብዝሐ እብ ሀመሌ ለተለ 166 ብቀት ክምስል ሳደፈ፡ እብ ሰበቡ ህዬ ምር ነፈር መይት ዲብ ህለ፡ 103 መደረት ክምስል ሳድፈቶም፡ ዲብ መምተለካትመ 1.4 ሚልዮን

ነቅፈ ለልትዋገም ደማር ክምስል ጀረ እንዴ ሐበረ፡ ምስል ናይ ሰነት 2021 ዲብ ልትመጣወር ብዝሐ ብቀት እብ 32 ምእታይት ክምስል ዜደ አብረህ።

ሰብብ ናይ መብዝሐ ብቀት፡ ሽፋግ፡ ቢቃዕት ሰዋገት ይህለዮት፡ ዓፍየት መኪነትክ ኢፈተሾት፡ ቃትን ወንዛም ተራፊት ይአመሮት ወኢራቀቦት፡ ከምረት እንዴ ሰቴክ ሰወጎት፡ መኪነት ዲብ ሰውግ እብ ተለፎን መትሃጋይ ወናይ ሙሲቀት መስምዒ ዲብ እዘንክ ሳቀቀት ክምስልቱ ሐቀለ ወደሐ፡

መጀተመዕ እብ ዓመት ወደረሰ ህዬ እብ ፍንቱይ ዲብ ሰፈሮም ልብ እግል ልክረው ወልደገን ክምስል ስም መክረ።

ሚጀር መሓሪ ዲብ ደንጎቤ፡ ዲብ ደዋይሕ መዲነት፡ መስቀላይ ጽርግዩ፡ ጀዚረት ትራፊክ፡ ብቀት ለሰብብ መለዋለት ወመዐደዩ፡ ዲብ ምክራይ፡ ቢንቶ፡ ጽልመት ብዝሐ ሽዑብ ዲብለ ብእቱ፡ ሰዋጊን መካይን ሽፋንቶም እግል ለአንቅሶ እንዴ አትፋቀደ፡ ብቀት እንዴ ኢትጀሬ እግል መዳፈዕት መስኡልየት እግል ትሰመዐን አትፋቀደ።

1^ይ ክፈል

ሕርየት!!! ዘዐት ቀላል ወጥዕም፡ ወፈዳቢት መዐነት። ምብላሰ ጥዕም ወሄራረ መሪር ወወውላመ ቃሊ ወአኖካዩ እብ መሳይብ ወመግማጨት ክሉብ ወሱዱድ። አሰቡሩ ወመታክል ሕቡሉክ። እብ ሰብ ዋይዲባት ዎ ደቦ ድቡዱብ ዎ ትሩቁብ። አርወሐት ፍራስ ሓዩት ቤዛህ ለትገብአት፡ ዐውል ቃልየት አርወሐት ወደም ክዑይ ወዕወጭም ሰቡር። እለ እተ እነብር ለህሌነ አርደት እብ አድማዮም ተ ለትሰበቀት። አይወ! እብ አጭሞታቶም ተ ለትከለበት ወለትነደቀት። እግል ዐውል ሕርየቱ እሊ ክሉ ክዑይ እንግዮ ወሌሂ ፋርስ እት እሰሮ እት ሰለሰል ሐጺን ለትል ወለሐንጅር። እብ ለሀበት ገርቦም ተ እለ አርደት ለዕምርት ወመናድቀ ዑርር። ሕርየት መስኩብተ ወሰላም፡ ፡ አምን ተ ወሕሽመት ወአማን። ምስል ተጠውር ወመትቀዳም። ሕርየት ክሉ ተ። በንዴረት ሰቅልት ወብሶት ርፍዕት ወነፍስ ዕሰሚት። ሕርየት አሰደሮት ቀራራት ወአፍገሮት እስዳራት። አትመቃርሐት ገቢል ሐቅ ተቅሪር መሲር። ሕርየት ገሊ ክምሰል ሚራድክ፡ ወብጽሕ ክምሰል ሽንሂተክ ወወጃብክ። ሕርየት ኢኮን ክምሰል ስሜተ ቀሌለት። እግል ረኪብ ሕርየት ለኢልትህባብ ትባልሐክ። ምን አርወሐት አላፍ ኡብጽሐት ወወሬዘ ጀላበ ትፈንቴክ። ማለ ወተዋብ ላኪን ዐደዱ እሊ ማቱ እግል ገበል ይእንቀድር። ህቱመ ፍትሐ ገብእ እግል እለ አርደት፡ ፡ እባቱ ሕርየትን ዐውላ ቃሊ ወሄራረ ሰዱድ!!! ለእንብሉ። ሕርየት ዕሰመት፡ ለውቀት ወሸነን እት ምድር አበው ወአብዕቦታት ወለሕሹማት አቦታት!!! ሕርየት ምን ህለ ገብእ ልትዓደለ!? እምበለ ቤዛህ ለገብእ ለሸሂድ ባትክ ጎማቱ!? ህቱመ እት ክብደ ሐቅፈቱ ምንዲ ገብእ ዐውሉ።

አቤ፤ ሄራር ሕርየት ሰኒ ሰዱቱ ወንቱል። መዳግሙ ደዋት ክልስ ወአቅሉም። ሄራረ ሄራር ሳምን ኢኮን ወአሸሁር። ክብድ ሰፍራት ወመቅጠን ዕሩቅ። እግር ትጊት ወሸንሂት እት ሰመ ሰቅል ወሰልም ካሪህ ሕትል ወግምጩይ። ገቢል ሽዕቱር ወሕረም ባኪ ወሁቱል። አሸፋራት ዝሙት ወማላት ሸቱት። ሄራር ሕርየት ክታሩ ኢልትብጸሕ ወኢልትከለስ እት ውሕደት ገቢል ትንኩብቱ ወእግል ወቱዱ ጉሙይ። ክታር ሴረ እብ ሰለሰል ኤማን ወሰብነት ሒጡጥ፡ አሴ ፍርስነት ሐጠር ወመትሰባል፡ ለአተርገዝ፡ ወዴማቱ እብ እስትሸሃድ ሸመሊት ለትቃረናቱ። ምን እሊ ክታር እሊ እንዴ ተዐበ ወሰፍረ አው መሸገ ክሴሩ ለቀርጨ እብ ቀለ ቀሎ ኢኮን ለእግል ሴር ለቀርጨ። ላኪን ምን እግል



ሕርየት ገበይ ረደም ወዐውል ቃሊ!!!

ክለ እለ እዲነ ለአትፍከረ ህዬ፡ አሰክ እለ አዜ እነብረ ለህሌነ ለሐዘት እት ምልዐል እለ እግለ እንፈቱ አርደት እት እንቱ እብ ልቡ ወቀልቡ ረአዩ ወሰምዑ ለልትፈንተዩ ኢትፊኤ። ዐጃይብቱ ምስጢር እለ ወጠነ!!! ክሉ እግል ሀለዮተ ለሐሌ፡ ወእግል ኬረ ወሰኔተ ልተምኔ ወገሚ። እግል ዐቦተ እት ከደን ልትመዬ እብ ጸሓይ ኢለአባሌ ወምን ዝላም ኢለጽሄ። ክል ምሮት አሰክ ሸንሂታቱ ልብጽሕ እት ክል ጨባብ ልትሐኔ። ሐድያይ ሕርየት ላኪን እብ ሸንሂቱ ኢኮን ወትምኔቱ እግል ሸንሂት ወጠን ቱ ለለአቀድም ወልተምኔ። ሐቆ ሀለዮት እለ አርደት ሀለዮት አርወሐቱ ለአመርዴ። እሊ ክሉ ሐቆ ንዳል ሰላሰ ሐል እብ ገበይ ሰልምየት፡ ወንዳል ሰላሰ ሐል እብ ቅልጭም ገቢል ድድ ዜምተት ወዌረት። ሕርየት አፍያት ዓረት። በንዴረት እት አካን ሕሸመተ አንበልበለት። የሀው!!! እለ ሕርየትን ለመዳግመ እግል ክሉ አትፈክረት። ዓለም እብ ግዲደ እብ ተእሪክነ ትዐጀበት። እግል መትዐንቀፎትን ዋይዲባት ሰጠረት። “ክሉ ዌዳያይ ሰኔት ሐሰደቱ ብዝሒት ተ” ለትብል መሰል አማን ተ። አዜ ሐዳስ እትን ኢመጽአት።

አይወ!! ሄራር ሕርየት ገበይ ረደም ወዐውል ቃሊ!!! ክሉ ገባይ እዲነ እት ሄራር ገብይ ሕርየት ዐውል ቃሊ ወገበይ ረደም ትልቱል ወኩቱር ምንመ ገብእ!? ላኪን ኢክም ሄራርን ወሕርየት። ሕነ ክምሰል ገቢል ወክምሰል ሽዑቤ ሕርየትን ምን አፍያትን ወአዴነ ሰበት ትቃጨፈት። ክሉ መታክል ወአሰቡር ሐያት ዐውል ቃሊ እግል ንድፊ እቱ ትጀበርን ወትቀሰብክ። እለ ዐድነ ክል ገአተ ተአትዐጅብ ተ ወተአትፈክር!!! ሸሂድ ምሮት እት ሳርሐ ካልእ ሸሂድ እት ርሕም አንሳይት ኤረትሪያይት ልትሐነን!! ወእት ሕቅፍ ለፋርሰት ገመኔ እት ልትሐፈዝ። ምን ረቢ ለባረከዩ ሐሊበ ኤማን ወሐጠር ልትመወን። ከእባቱ ለአርወሐቱ ለብርእ ኢትወዴ ክምሰል ወድ ምን አደም እት ወቅት ጸገም። ለመሳልም ገቢልን ወለ ኢናዩ ለኢለሐዜ ሽዑብን ምን ሸፍሩ ሰበት ቃጨፈ ወትዘመተ እግል ሐቁ እብ ገበይ ዐዳለት ወረታዐት ወሰልምየት ምንመ ሐዘዩ፡ ለትሰምዕ እዘን ወለ ትርኢ ዕን ሰበት ኢረክቤ። እግል ቃልየት ሕሪየቱ ደሙ እንዴ ከዐ ወዐጭሙ እንዴ ሰብረ እብ ገብይ ታረት ወግምጩት እብ ሒለቱ እግል ልሕዘዩ፡ ወቃሊ ተብን እግል ልድፊዕ እግል እት ዕጡጢት ትፈረደ። እሊ ህዬ ፍርድ ዝልም ወሕክም ቀሰብ ወጀብር እት እንቱ ዐለ። እለ እንዴ እንብል ላኪን ለኖሱ

እንዴ ትጀበረ እቱ ለካተረዩ ሄራር ረደም ወንዳል ዓድል እግል ሐቅ ዝሉም ሽዑብ ወሐቅ ተቅሪር መሲር እት እንቱ ቱ ለዐለ። ሞት ወቅታል ወዐለዮ ወመትሸዐታር እንዴ ትሸንህ ከከደን ለሰክነ ወምሰል ካሳይብ ለትመሳነ ላተ እብ ሚራዱ ኢኮን። ክምሰል ክል ሐዘያይ ሰኔት ወመተምኒያይ ድንሰት ወኪር፡ ሕናመ እግል ሐያት ሰላመ ወመስኩብተ ለኢነሐዜ ወኢልተምኔ ይሕነ። ቀርድነ እግል ድሴ ወትምኔትን እግል ደሐን ስከቢት ወሰላም ቱ ለዐለ ወለ ሀለ። እግል እት ክል እነት ወሳዐት እገለ ጭራት ዓማት ማይነ ወለ ቅዱይ ሸማል ሞዳይነ ላለሐምርግ ያወይሉ!!! ህሙላም እግሉ ኢነአምር ወአዜመ ኢንትሀመል እግሉ።

አቤ፤ ደሙ እግል ልክዔ ወዐጭሙ እግል ልሰበር ወእት ኢሞዳይ እግል ልትዐዴ ለትቀሰብ ገቢል፡ አሰክ ምራዱ ኢተመ እግሉ ወመቅሰዱ ኢበጽሐ። እብ ቀለ ቀሎ ለላአቀብል ወደኪለት ወኤፈኖት ለልትከበትመ ይዐለ። እግለ እት መቀደሚሁ ለዐለ ራትዕ መቅሰድ እት ካቲማሁ እግል ለአብጽሐ ምን ትብገሰቱ ነው። ወለ በዱል አለበ ቃልየት አርወሐቱ እግል ልድፊዕ ወልትሰብል ለቃሊ ሀደፋ ቀሰቡ ዐለ።



ለናይነ ሕርየት ፍንቲት ተ ምን ሕርየት ብዕዳም ገባይ እለ እተ እነብር ለህሌነ እዲነ እላ ተ። አቤ፤ ክል ምሮት ከናዩ ትጸነዕ እቱ ትገብእ። እብ ደሚሩ ልግበእ ወወቀዩ። ሕነ ላኪን ናይነ በይነተ ወበይነ በይን ገብአት ተ። እብ ሄራርን ወለ ቃሊ ዐውል ሕርየት። ወለ ብዋሕ እስትሸሃድ። ወለ ዋድሕ ኤታኑ። ምስለ ብዝሐም ሐሰደትን ሰብለ ጸብኢታት ወለድጉል ዋይዲባት። ኮንዶእ እንዴ ኢኮን እግል ሕርየትን ለልትዓደል ወለ ልትዋገም ለህሌ ኢመሰለኒ።!!! አይወ። እለ እግል እብል ለህሌኮ አማን ሌጣተ!! ዕንዳቄነ እግል ሐቅ!!! ወግንዳሌነ እግል ፋሽ ወሕሸመት!!! ሰድት ክምሰል ረሀይት ወጽልመት ክምሰል በርሀት ንትዐደዩ። ሰፍረ ክምሰል ጽጋብ ወእኪት ክምሰል ሰኔት ነሐሊፈ። ሐቱ ተ ከክምሰል ገጸ እት እንዋጅህ እስልፍ እብ ገበይ ዐዳለት ወሰልም፡ ወሐር እብ አሰሉብ ቅታል ወቅልጭም። ሄራርን እንዴ ኢነአትካርም ለእግሉ አሰተብዴነ ምሸዋር አተላሌናሁ እምበል አትካራም ወክትል። ለቃልያም ለእግሉም ደፍዐነ ፈራሰ ወለ አሰክ እለ ምን ዓድል ሄራርም ለኢትፈንተው፡ ወለ



ይአትካረመው ፍራስነ ገበዮም ብዲር እግል አምጾት ሕርየት፡ ወዮም እግል ዓቅቢተ ወሕሸመተ ክትት ኢነሰአው ምነ ለሰበ ሰልፈ ወለ ሓርያም ዌርሰተ። ዓላብ ሰኒን እት ሰነት1890 ለአሸር ዐለ። እተ ወክድ ለሀይ ኤረትርየ ክምሰል ደውለት ሕዱደ ምን ጌዳን እት ጌዳን እብ በር ወበሐር እት ካርተት (ኻርጠት) ዓለም አካተት እብ ረሰሚ ጸብጠት ተ ለዐለት። እተ ወክድ ለሀይ እብ ሒለተን ወተጠውረን ስሚተን እስሙያት ለዐለዩ፡ መትድእክት ድወል፡ እግለ እት ሐንቴህን ለዐለዩ ምስትዕምራተን ሕሪየተን እት ለሀይባህን ልትረአዩ

ዐለዩ። ሰበቡ ሐቆ ካልአይ ሐርብ እዲነ፡ እዲነ እብ ግዲደ ትሸዕትርት ወሽዑብ እዲነ እብ አሰባብ ሐርብ ወአምራድ፡ አልሀሽ ወኢመስኩብት፡ እት አክይ ሓል ወብቀት ዳይመት ኩራት ሰበት ዐለት ቱ። እምበል ገበይ ሰላም ወአማን ካልእ መንገት አው ባብ ልትረአዮም ይዐለ። እግል እሊ ለእግሉ እንቤ መሻክል እግል ዓለጆት ህዬ መጅልስ ቅራን እግል ልትአሰስ ላዝም ቱ ለዐለ፡ እምበል ካልእ ሕርያን።

እት ሰነት 1945 እብ ውፋቅ ክለን ድወል እዲነ መክተቡ እት ኔዮርክ አሚሪክ ፈትሐ። ለአገደ ወቀዩ ህዬ፡ ክምሰለ እት ለዐል ለትሸርሐ፡ ገባይ እዲነ እግል አትሓደሮት ወአትመቃርሐት። ሰላም ወመስኩብት ገቢል እግል ትትመደድ። አልሀሽ ወአምራድ ክምሰለ እግለ አሰረተ እዲነ ህቱመ እግል ልሰረት ወልፍኔ። ቱ ልብለ ለዐለዩ። ምነ አገደ ምህመቱ ልእግለ ተአሰስ እብ ገራቢት ሰለል ሻክፈት እት ልትማጤ ምነ ትረአ። እሊ እት ሐንቴ ዝልም ወጨቅጥ ለዐለ ገባይል እዲነ ህዬ ገሌሁ እብ ራተዐት ወቀናዐት አት ልትፈሀሙ። እበ ለሐሬ ጀሬ እንዴ ኢልሐሰብ፡ ገሌሁ ህዬ

አወለጦቱ እት ለአትፈክሩ ወሰአዮቱ እት በትክ ምነ እግለ እሱስ ለዐለ ጋሪት ምስኒዮት ወሰላም ወደሐን ስከቢት ወአማን እት ልትሻቀል ልትርኢ ዐለ። ሰር ህዬ እግል ልትገበር እግሉ ወእት ሐንቴሁ (ሰምዐን ወጣዐን) እት ልብል ትረአ። ገሌ ምነ እገለ መንዘመት ለአሰሰዩ ህዬ አሰክ እለ ዮም ክምሰል መትፋርህ ወወሰለት ቡኡይ እንዴ ወደያሁ ድቁባት ደወል፡ ምን ለሐዝዩ ቀተለ እቡ ወምን ለሐዝዩ መንዐ እቡ ህለዩ ወዐለዩ። ሚርሐት ብልዳን ዓለም ህዬ ክልኢ እዳዩን እንዴ ሐቅፈዩ መትቅብለት ገብአት ህለዩ። ሐምቅመ “አነ” ለቤለ፡ ሐዋኒቱመ ወግሊቱ እብ አፍሁ ለበልስ ይህለ ወይዐለ።

ናመ ክምሰል ገቢል፡ ሐቆ ኤረትርየ ክምሰል ደውለት ወሚልካይት ሰያደት ሕዱድ ሰመሀ ወበረ ወበሐረ መልክት፡ እስትቅላለ እግል ትንሰእ ላዝምቱ ለዐለ እግለ። አቤ!!! እምበል ሸክ ወፈክ። ውላድ እለ አርደት ክምሰል ክል መዋዋኒን እዲነ እት ካልአይ ሐርብ እዲነ ምስለ እት ወቅት ለሀይ እስትዕምርትን ለዐለት ጥልያን እት ቅሩብ ወረይም ትሓረበው ወሞተው። እበ እተ ወክድ ለሀይ እት አርቢ ዘመኒያይ ተጠውር ተአትጋይስ ለዐለት ጥልያን ኤርትራዩን ወኤረትርያመ አምሮም ፋይሕ ወረአዮም ባቅዕ ቱ ለዐለ። እብ ክሱሰ ሕርየት ወሰያደት ድራሰት ለሐዘቱ እግሉ ይዐለው። ሕርየት ቀላል ዘዐት ወትርድት መዐነት ወተርጀመት ክምሰልማታመ ቃውያመ ይዐለው። ላኪን ለክይነት ወለ ዝልም በክት ሕርየት ወሰያደት ዐድነ እግል ኢንርከብ እት ሐብክ ዝልም ወከይናት ፍሩራም ዐለው። ላመ እግል ሰላም ወመስኩብት ወአትሐደሮት ገበይ እዲነ ለተአሰስ ምጅልስ ቅራን። ምነ እግለ ተአሰስ መሃም ሐቱ ሰበት የአግደ። ዝሉም ገቢል ሸንርቡ እንዴ ኢትትርኢ ወኢትትሰምዕ እግል ሐቁ ወሚራዱ እብ ዕን ከይነት ወዝልም ልትገነሕ ዐለ። ፈርደት ዕጡጢት ወከይነት እት መጦሮም ለበልስ ወለ ልትቃረሞም እብ ድገለባይት እዝኖም ሰምዑው ወእብ ብክሉሕ ሕክምም ለሓከሙ ዐለው። እግል እሊ ዋይዲባት እሊ ሰኒ እንዴ ወደው ልፍሁሙ ለዐለው ግም አርበዓታት ፍክሮም ወሞራሆም ድዱ እግል ልርፍዮ ትቀሰበው። እብ ሚራዱ እግልሞት ወቅታል ለትፈረረ ላኪን ይህለ። ሕርያን ሐቆ ሰአንክ እት ኢሕርያንክ ትትጀበር እንዴ ኢኮን።

ምስትንክር ሄራር ሰባተት!



እስልፍ እግል ክሎም ዲብ ቀበት ዐድ ወካርጅ ለህለው፡ መዋዋኒን እለ ምድር ምስትንክራት ወፈራሰት አሰናይ ዲብ 32ይት ሰነት ዒድ ሕርየት ወእስትቅላል አብጸሐኒ እንዴ እምብል፡ አሌላት ዒድ በኪት እንዴ ንተምኔ፡ ሸዐብ ኤረትርየ ዲብ ዐድ ወካርጅ 32ይት ሰነት ዒድ ሕርየቱ “ምስትንክር ሄራር ሰባተት” እበ ልብል አርእስ እብ ለትወቀለት ደረጃት እግል ለዐይድ መትዳላዩ እንዴ አትመመ፡ ለመናሰበት ቃልየት ልትጸበር ሀለ። ዒማታት አካባርመ ክም ክፋል ናይ እሊ አሽቃል ሐበን እሊ፡ ምን ዮም ምዕል እንዴ አምበተ፡ እግል መናሰበት ለከሰሰ ለትፈናተ በርናምጃት እግል ልቀድምቱ። ከእትሊ ናይ ዮም በርናምጅኑ፡ “ምስትንክር ሄራር ሰባተት” ለልብል ክቱብ ሐጨር እግል ንርኤ።

32 ዓመት ዲብ ሄራር ሕርየት ብዙሕ ሰነዎት ምንመ መሰል፡ እግል ኤረትርየ ላኪን እምበለ ቀዳምያት 7 ሰነት ሰላም ወረሀየት ወዐማር፡ ለተርፈየ 25 ሰነት፡ ገሌህን ምስል ሐርብ፡ ለበዘሐየ ምንን ህዩ ዲብ መራሕል ሰዱድ ወሐለት ኢሰላም ወኢሐርብ፡ ክምሰሌሁመ ዲብ መጋብህት ድቅብት ወመባጥር ሳብት ለሊሐዜ ለተሐባለክ ጀርቤታት ከይነት ዐዳወት ወቀራራት መኔዕ ዛልም መጅተማዕ ዐለም ለትጸመደት ዲብ ክም ዐላ፡ እግል አከዶት ሕፍዘት ወሕሽመት ሕርየት ወእስትቅላል ወምለዐል ኩሉ ሕሽመት ሰያደት ወጠን ለትደፈዐ ዐወል፡ ለሄራር መዳፈዐት እብ ዕጹፋት ክም አክበደዩ፡ ሽሃደት ለሊሐዜ የዐለ፡ ሕክመት ኤረትርየ ምስል ሓድረት ሓለት ዐድነ ለናሱብ፡ እግል መርበይ ሄራርን ለሰዴ አውለውያት እንዴ ረተበት፡ እብ ወቅት ወቅቱ ከይናት አባያምን እንዴ ትፈልል፡ መሐለኪት እንዴ ትባትክ ሰበት ሄረረት፡ እላተ ለዕላመት ሕሽመትን ወሰያደት ምድርን ላተ መንዴረትኑ፡ እንዴ ትወቀለት ዲብ አካን ሕሽመት ወሐበን ተአንበልብል ህሌት።

ዮም እብ ክሰሱ ዝክረት 32 ሰነት ሕርየትን ንትሃጌ እንዴ ህሌኑ፡ ፍራሰን እግል አከዶት ሕሽመት ሰያደት ወጠን ለደፍዐው ተመን

ቃሊቱ ንትዘክር ለህሌኑ፡ እብ ፈድል ኤማኒ ወሰባተትን እሊቱ ኩሉ ጋራት ትቀየረ። ለእግል ለአድንኑን ለተምነው ቅዋት፡ እብ ፍርሰነትን ወውሕደትን ትርድት፡ ለኢልትረሰዕ ደርሰ እንዴ ሀብኑ፡ እሎምቶም ዮም ስሜቶም እንዴ ትከፊት ወራየት ሕሽመቶም እንዴ ደነት፡ ዲብ ግድፍ ግማመት መትሐፍ እንዴ አተው ዐለው አተበለው።

ኤረትርየ ዐድነ ላኪን፡ እላተ 31 ሰነት ሕርየት እንዴ አትመመት ዲብ 32ይት ሰነት፡ ረክሰ ራፍዐት፡ ሻነት ወሕብንት እንዴ እንተ፡ ዲብ ተዩልል ዐለም ሐዳስ እግል ተዐይደ ዲብ መትዳላይ ትረከብ ህሌት። እለን ሓልፋት ለህለየ ናይ ሕርየት ሰነዎት፡ ዲብ ሐያት ወዝክርያት ለገብአ ልግባእ መዋዋን ኤረትርየ ተርጀመት ፍንቲት ወሕሽመት ለበንተን። ሕርየት አማነት፡



ወሕርየት ሕሽመት ወሐበንተ። ሕርየት ኩሉ ክምስልተ ለልሽህድ ወለለአክድ፡ ዲብ ሄራር ግድለ ሕፍዘት ሕሽመት ሰያደት ለፈረ ዓዳት ወነባሪ ወጠን ወወጠንየት ቱ። ዲብ ሕርየት ኩሉ ሀለ። ክም ሸዐብ ወወጠን እብ ሰያደተ ወሕርየት፡ ዲብ መብዳእ ሐር ሕርያን ደማነት ዲብ ኖሰሱ ለለአተንክብ። ሕርየት ዲብ ሰያሰት፡ እቅትሳድ፡ ወሐያት ሄራር መንበረት እጅትማዕየት፡ መኒኒ እንዴ ትበገሰ ዲብ ለለአቀብል ለኢልአትካርም ለዛሬ ወለተንክር ዓዳት ወነባሪ ወጠንየት ጠልብ። እብ አናሺድ ወአሸዓር ወእበ እግልን ወእግል ወጠን ወወጠንየትን ቃልየት

አለብኑ። ዲብ ሄራር ክል ሰነት ሕርየት ለተአከደትመ እለ አማን እላተ።

ሕርየት ኩሉ ሐዜት ወተሐዜ። ወቅት፡ ሐለት፡ ማል፡ ዳር፡ ናይ ብሕተ ፍጥር፡ በሰር፡ ተፍኪር ወአርወሐት ቃልየት ኩሉ እግል ተሀየብ። ዲብ ቅሩብ ወረዩም፡ ዲብ በር ወመዳይን፡ ዲብ ዐድ ወካርጅ፡ ዲብ አሮት ምስትንክር ሄራር ሰባተት፡ ወሀንደገት አሮት ልብል፡ ክሎም እብ ሕበር እግል ሕርየት ቤለው። ደረጃት ዕምር፡ አንስ ወተብዐት፡ ድያነት፡ ሉቀት፡ እብ ሕርየት እንዴ ልትቀየስ ወልትዋሌ ሰበት ሄረረ ወአሳደረ፡ ዲብ ተርጀመት ወባልሐት ክል ጋራት፡ ዲብ ለለሓልፈ ልእከት ወቅያስ መትመዳዱ ማዕነት ሕርየት ሚተ ምን ትትበሀል፡ ሕርየት ሕሪት ምን ሕሩያም፡ ወህያብ ቃሊ እግል ሕሩያም ወቃልያም ክምስልተ እብ አፍ እንዴ ኢገብእ እብ ፍዕል እኩዳም ህሌኑ።

ዓመተን ልትጌመም እንዴ ሀለ፡ እትለን ለሐልፈየ ሰነዎት ለመጽኦ ተቅዩር ወዐቦት፡ ሰአየት ለሀህይብ ሌጠ እንዴ ኢገብእ፡ መስተቅበልን ሚክምስል መሰል ለለአክድ ቱ። ምናተ ሄራር ብነ

ወጠን ወወጠንየት፡ ዲብ ቀበት ሰነዎት ሐድ ለተምም ሸቅል ኢኮን። ሕነ እግል ሕርየትን ንትጋደል እንዴ ህሌኑ መጦርለ ዲብ ብናእ ወዐማር ለሐልፈውን ገባይል እግል ንትረተብ፡ ሸቅል ረዩም ወድቁብ ልትጸበረን ሀለ። እሊ ሄራር እሊ ህዩ፡ ኩሉ ጅንስ እስትሸሃድ ለጠዜ። ምን እሊ ጸብጣሙ ለህሌነ መርበይ አውመ ሰለል እንዴ ኢእንሸክፍ፡ ምን እሊ እሊ ዲብ ዐዳትን ወነባሪን ለንትአመር እብ ምስትንክራት ሰባተት ወመትሰባል እንዴ ኢነአወልዋ፡ እብ ሕበር ምን እንክድም፡ ለዲብ ነሳፈት ቅርብት ነአትቅብለ ለህሌነ ትምኔት በጼሕ ዲብ ሀደፍ ኤረትርየ ዋውርት ወዕምር፡ ክም እምበጽሐ ደማነት ታመት ብነ። ሩእየትን ኩሉ መጅተማዕ እብ ወጠንየቱ እንዴ ልትሐበን፡ እብ ሰላም ወረሀየት ለነብር ዲብ፡ ሐቁ እብ ቃትን ወዐዳለት ለተአከደ እቱ፡ ዲብ መሬሕ መንበረት ሐያቱ ወወጠኑ ሕሽም ወሻንን እንዴ እንቱ መሻርካይ ሰቡል ወዕጹም እንዴ ገብእ፡ እብ እቅትሳድ፡ ወጀደማት እጅትማዕየት፡

ምን ነአተላሌ፡ ዐድነ ዋውር መዋሰላት ምድር በሐር ወሰመ፡ ለትጠወረ እትሳላት፡ ክጡዋ ከደማት ማይ ወከሀረበት፡ ምን ርክን እት ርክን ለትመደደ ዲብ፡ እተዩ እግል ጠለብ ቀበት ዐድ እንዴ አትመመ እግል ተስዲር ለገብእ እተይ ሕሩይ ለለአቱ ለትትጃገር ሰናዕት ለብ፡ ሐርሰ ዋውር ለትመደደ እቱ፡ ሸዐብ ለትመታወረ ወታምም ከደማት ዓፍየት፡ ታዕሊም ለረክብ ዲብ፡ ሕፍዘት ርክቅ ዕጩይ ወሐዋናት ከደን ለተአከደ ዲብ ክም ትገብእ፡ ሸክ አለቡ።

እምበል ሸክ ህዩ፡ እሊ ዲብ ፍዕል እግል ልተርጀም፡ ለማሌ እበ ለኢልትሐልል ግድለ፡ እብ ኤማኒ ወሰባተቱ ኩሉ መታክል እንዴ ሐልፈ ወፈለ፡ እብ እስትሸሃዱ ሕርየቱ ለአከደ ሸዐብ ዮመ፡ እሊቱ ዲብ ሸቅል ብናእ ወዐማር እንዴ ትበገሰ፡ እብ ፍርሰነት ወሐበን ዛይድ፡ ደሙ፡ ለሀቡቱ ሐለቱ እንዴ ሰበሉ፡ ለዐበ መቶር ዐማር ወብናእ እንዴ ገብእ፡ አምዕል ወላሊ ዲብ ዐማር ወአዳፈዐት ሕሽመት ሰያደት ወድድ ዐዳዋት ወጠን



ታዕሊም ወሀንደሰት ፍጥር ፈን ለትጠወረት፡ ረሀየት ለተአከደት ዲብ ወጠን እግል ተሀሌቱ።

ውላድ እለ ምድር ሐበን ወፋሽ ህዩ፡ ፈተ ሸቅል፡ ፈተ አማን ወዐዳለት፡ ደማነት ዲብ ኖሰ፡ ዐቅል ወፈሀም ዛይድ፡ ፍጥር ወማዕጸም ለዐላይሙ ዓዳት ለመልክ እግል ልግባእቱ። እለ ሩእየት እሊ፡ ሀም ወቀልብ ክሎም መዋዋኒን እለ ዐድ እንዴ ገብእት፡ እበ አሰክ እለ ለአርኤናሁ ማዕጸም ወመትሰባል

እንዴ ከድም፡ ለሱድፍት ለዐለት ገሸለት ሕማም ኮሮን ቫይርስ፡ እበ ኖሱ ለሐረዩ አብሳር ዲብ ሐንቱ መራቀብቱ ክም አተ፡ ለህሌነ ዲብ መደት ኖሰ ሳሁድተ። ክምስለ ሄራር ግድለ እግል ሕርየት፡ ለሳድፈን መታክል እንዴ እንዳፈዕ ወእንፈልል፡ ሄራርን እንዴ አደቀብነ ረክሰነ ቀደም እግል ነአሳድር፡ ዲብ ለትበገሰን እግሉ ሀደፍ ወትምኔት እግል ንብጸሕቱ።

ምስትንክራት ሄራር ሰባተት!





3^ይ ክፍል

ከምሔርባይ ጽብ



ምናድል አረፋይን ቀደም ሕርየት


አረፋይን ደፍሎት ጀማሪ ሳሕልቱ ለዐለ። ክምሰል አብ። ክምሰል መምህር። ክምሰል እቅትሳድ። ክምሰል መመቅረሓይ። ክምሰል ሚርሓይ ወለመሰሉ እብ መትሰባል ለሸቀ ምሔርባይ ተ። ዐቢ ዲብ እንቱ ምሰል ነኣይሸ ገሚ። ትዕብ ዲብ እንቱ እግል ወቀይ ቀንጽ። እብ ትሉሉይ ጦፍ ገይሰ ወጃሽ መሬሕ። እብ ክእን ህይ ዕን ናይለ ዲብ ድዋራት ነቅፈ ለዐለት ውሕደት ጀማሪ ዐለ። ዲብ ክሉ ወቀይ ሰበት ልትሸፈል እግል ዲብ ወግሬት ለዐለት ውሕደት ጀማሪ ሲያሰት ወኣካዳሚ ምን ለአደርሶ ለዐለው ዎርቱ። ምን ጠቢዐቱ ህይ በርእ ወፊታይ ሰኔት ተ። ሐቆ እንሰሓብ እስትራተጂ ጀማሪ ሳሕል ዲብ ክለ ሳሕል ፍንጡራም ምንመ ዐለው ከረ አረፋይን ላተ ዲብ ድዋራት ነቅፈ እንዴ ገብአውቶም ሽዕሪም ለአፈዘዎ ወንዝዎ ለዐለው። ዲብ በክት ረክቦ እቱ ህይ ናሶም አካዳሚ ወሲያሰት ደርሶ እት ህለው አረፋይን ክምሰል መደርስ ወመመቅረሓይ ናይ እሊ ክሉ ዐለ። እብ ዕምር ምን ክሉም ለዐቢ ሰበት ዐለ ህይ ክሉም መልሂቱ ለሐሽጹ ወለሕተሩ ዐለው። እብ ሰብ በራኡቱ ምሰል ደረሳይቱ አርወሐቱ ለጃዝ እት አምዕል ዐለት ምን ልብሉኩም ህይ ሚ ወትበው?

አይወ ሐቱ ፈጅር አረፋይን ዲብ ወግሬት ሲያሰት ለአደርስ ዲብ ህለ ሱድፊት ትምባክ እግል ልጥፈእ ምን ፈሰል በረ ክምሰል ፈግረ። እለ ኢኮን እንዴ ደንገረዩ መጽእ ለዐለዩ ሳዕድዩ ወአልማዝ ትከበተያሁ። እለን ክምሰል ረአ አረፋይን ሓርቅ ዲብ እንቱ። “ሚቱ አሰክ እለ ተኣከርክን ሙሽ ድራሰት ህሉት ተአምረ? እሊ ናይ ምን ቅብብ ቱ? የለ በጥ በለ” ቤለየን።

እሊ ለሰምዐት ሳዕድዩ እብ ሸፋግ ዲብ ምድር በጥ ትቤ። ለሻዋረት ወለት አሰመረ አልማዝ ላኪን። “አነ ከፎ ዲብ እሊ ማይ በጥ እግል ኢበል” ዲብ ትብል ሐመጣመጠት። ወዲ ክንፌ ሰኔ

ሓርቅ ዲብ እንቱ “አማውርቱ የለ በጥ በሊ ትብህልኪ በጥ ትብሊ” ክምሰል ቤለዩ አይመ አልማዝ “ከ አነ አይ ከፎ እንዴ ወዲት ዲብ እሊ ዘረ በጥ እግል ኢበል” አይመ አትመሳመሰት እሉ። አረፋይን ሓርቅ ዲብ እንቱ “አነ ደአምር በጥ በሊ ትብህልኪ በጥ በሊ።” ክምሰል ቤለዩ “ከአነ ከአፎ በጥ ክምሰል ልብሉ ደአምር አፎ ኖሰክ ኢተርኤኒ” ዲብ ትብል ዐጂበት ህዋየ ተሃንቲ።

መስኪናይ አረፋይን ወለት ነሲበት ትከበተቱ ወምን ጠቢዐቱ ህይ አዳም እግል ለርኤ ወለሐብር ለፊቱ በርእ ሰበት ገብኡ። ክእን ትወዲ ቤለዩ ወእንዴ ኢልትአመሩ ዲብ ማይ በጥ ቤለ እግል ለርእየ። አልማዝመ ሐቆ እለ ላተ እግል አረፋይን እንዴ ጃዜት



ምሰሉ ዲብ ማይ በጥ ትቤ ወሰልሲቶም አረፋይን። ሳዕዳዩ ወአልማዝ ዲብ ቅሩር ማይ ልባሶም ሸትራ። ወእብ ክእን ዲብ ፈሰል ክምሰ አተው ክሉም ግሉያም ለዐለው ምናድሊን ትሰሐቀው እቶም። እብሉ አልማዝ እግል አረፋይን ተልሄት እቱ።

ሐቱ መደት ወድ ክንፌ ዲብ ወግሬት ዲብ ሸቅል ትሩድ ጽሙድ ዲብ እንቱ ምን ቅብላት ተሰፋማርያም ለልትበህል ነፈር እቅትሳድ ብርጌድ 70 “ሚ ትወዴ ወዲ ክንፌ ዮም ጀማሪ መናሰበት ህሉት እግልኩም መሰለኒ” እት ልብል ትሰአለዩ። አረፋይን ህይ ሰኣላተ ነፈር ሰበት ኢፈተዩ ማሸግ ዲብ እንቱ “አይወ ህዳይ ህለ እግልን” ዲብ ልብል በልሰ እሉ።

ተሰፋማርያም ህይ ዲብ ህዳይ ጀማሪ ሰዋ እግል ልቀርዴዕ ዲብ ልትረመጭ። እብ ገጽ ፋርሕ “ከላሰ ህዳይ ሐቆ ህለ እግልኩም አነ ህይ ምን ፍርቀት ዓዳት ብርጌድን ሐልያይ እግል አምጽእ እግልኩምቱ” እንዴ ቤለ አሰክ ውሕደቱ ተሀርበበ።

ፈጅራተ ተሰፋማርያም ለእግል

አረፋይን በይአዩ ገለድ እግል ለአትምም ምን ፍቱያም ፈናኔን ብርጌድ 70 ላቱ ሸሂድ ዕቅቢጋብር ውብዕዳም እንዴ ጸብጠ ዲብ መዐስከር ጀማሪ ጠበሽ ክምሰል ቤለ። አረፋይን ለብህለ ዐለ ዘዐት ሐሰት ትቅብ ትቤ እቱ። ለእለ ልብል ወለሐድግ ቃዊ ዲብ እንቱ ህይ “አኣኣኣ ሚ መልሰኩም ጅማዐት ለሕሰብ ዐለ ህዳይ እብ ሰብብ ብዕድ ዳይ ተንዚም እግል ዶሉ አዘምን ምን። አይ ህይ መርሐብ ብኩም ዓርፎ ሻሂ ስተው” ቤለ ሰኔ ካጅል ወእሱፍ ዲብ እንቱ።

ለቅርደዐት ሰው ልትረአዩ ለዐለ ተሰፋማርያም ላተ ለኢሐሰበዩ ጋድእ ክመ ጸንሐዩ እብ ሐሩቀት ናድድ ዲብ እንቱ “ደሐን ወዲ ክንፌ ዮም ተልሄክ

እትን ላኪን እንታመ እንዴ ሰኩበክ ኢትትመዬ እለ ውዲትክ ኢትፈዴክው እትክ ምንገብእ አነ ዶአነ” ቤለ ወረኣሱ ዲብ ነክንክ አሰክ አነት አቅበለ።

አረፋይን ምን ጠቢዐቱ በርእ ቱ። አምዕል ሐቱ አረፋይን ሱድፊት መልሂቱ ብሸራት አሰአለው። ህተ ህይ እብ ሸቅል ተንዚም አሰክ ካርጅ አሰክለ ሐማሁ ለዐለት እተ አርቢ ወእብ ፍንቱይ ኢጣልዩ እግል ሊጊስ ክምቱ አሰአለው። አረፋይን እለ እብ አማን እግሉ ብሸራት ዐባይ ዐለት። እግልሚ ለእብ ልጃእ ጋይሰ ዐለ ኢጣልዩ ጅንዲ እንዴ ገብአ እብ ሸቅል ተንዚም ገይሰ ዲብ ህለ ዝያደት ፋሽ ወሐበን ትሰመዐዩ። ዲብ ልሳረር ህይ እግሉ ሳርሐው ለዐለው መልሂቱ። “ሚ እግል አምጽእ እግልኩም?” ዲብ ልብል ፍንጌ ሰላፊላል ወፈርሐት ሕትይ ዲብ እንቱ። ምን ኢጣልዩ ሓጃት ብዙሕ እግል ልንደእ እቶም ክምቱ ገለድ እንዴ በይአ እሉም እግል ዶሉ ምን ክትር ፈርሐት። “እግል መጸንሐ ለገብእ እሉም” እንዴ ቤለ ምን ላብሱ ለዐለ ልባሱ ዲብ መላጥዋ እግል ዎር ጃኬት ወእግል ዎር ክሸክ ዲብ ማጥዋም ልባሱ ወዘዐ እቶም። ህቶምመ እግል ሰርሐ አረፋይን እንዴ ቤለው ዲርሆ ሐርደው ወጸብሕ ሰኔ እንዴ ጸብሐው አሰክለ ዲብ ከርስ መዲነት ነቅፈ ለዐለ መክተብ ጀማሪ ሳረሐው።

አረፋይን እብ ፈርሐት ለከይዱ ቃዊ ዲብ እንቱ ለገበይ ሳዐት ላቱ ወደግ ፈለክ እንዴ ደን ዲብ መክተብ ቃእድ መጅሙዐቱ ለዐለ ሸሂድ መሐመድዐሊ ውራይ ጠበሽ ቤለ። መምሬሕ እግል ለህቡ ዲብ ልታኬ ላኪን ለአሰልፍ መልሂቱ ለበሸረውተ

ብሸራት እንዴ ኢትገብኡ። “እብ ሸቅል ብዕድ ትላኬኮክ ዲኢኮን ምንቱ አሰክ ኢጣልዩ እግል ትትበገስ ለቤሌክ?” ክምሰል ቤለዩ አረፋይን ለኢትጸበረዩ ጋድእ ትከበተዩ ዲብ አነት ህይ ክምሰል ምንዳይ ደቡስ ተወው ብህል ዲብ እንቱ ሕሰ በትኩ።

አረፋይን ምን ነቅፈ እንዴ ዲብ ልሰሕብ አሰክ ወግሬት ለአቀብል ዲብ ህለ ምን ቅብላት ለረአዩ ወምሰል አንፋር ጀማሪ እንዴ ገብአ እሊ ምህዩ እሊ ለመሀዘ እሉ ተሰፋማርያም ዲብ ልሰሐቅ “አረፋይን ተምሸየት ዲብ ሮመ ኢትረከበት እንታዲ አሰክ ወግሬትክ አቅብል እግልክ” ቤለዩ ወእግሉ ቀደም ለህ አረፋይን “ህዳይ ህለ እግልን እንዴ ቤለ እግል አረፋይን ብህለ ለዐለ ዘዐት ቅሸሽ ዝያድ ዐውሉ ደፍዐ።

መደት ሐቱ ሸሂድ ተኸለብርሃን ገብረወልዲ (ጋስትራይት) እት ሮረ ሐባብ እብ ወለፍ ውብርድ ክምሰል ተዐቡ ዲብ ወግሬት እንዴ ትከረ እግል አረፋይን ትምባክ ወከቦርተ እግል ለህቡ ትሰአለዩ። አረፋይን ምን ጠቢዐቱ አሰልፍ ሓርቅ ዲብ እንቱ በልሰ ወሐር ህይ ርሒም ወበርእ ሰበት ገብኡ አጊድ ለአቀብል ወጠለብክ ለአትምም እግልኩ። “ሰምዐኒ ጋስትራይት። ትምባክ እግል ሀበኩ። ላኪን አክል ርብዒት ዲብ ሰፍፍ አምዕል አምዕል ትምባክ ኢቲበል። እቅትሳድ ልመድ። ወሸፈትመ እግል እግልክ እግልኩ። ላኪን ስተር እግሉ ዲብ ለህለው ከረ ወድ ሰቤ። አረፋይን ሸፊት ሀበኒ ኢትበሎም ሰብብ ኢተምጽእ እቼ” ቤለዩ ከ ክም ርሒም ዋልዳይ በጣንዮቱ ወትምባኩ እንዴ ሀበዩ ሳረሐዩ።

ዶል ብዕድመ አረፋይን አመትለ ዲብ ኢጣልዩ ለዐለት እሲቱ እግል ሊዴ እንዴ ትበህለ አሰክ ከርቱም ሱዳን ሳረሐው። እግሉ ዲብ ሰነት 1963 ለሀደዩ ዲብ አርቢ ለዐለት ሐማሁ ተኸአ ተለፎን እንዴ አተሰለ ክምሰል ረከበዩ።



ተክአ ዲብ ዋልያን እንዴ ገብአት። “ምሰልክ ለዐለው አመት ሐዳርም እግል ሊደው መጽእ ሰበት ህለው አፎ ኢትመጽእ” ክምሰል ቱለቱ። አረፋይን እብ ሐሩቀት ነደ ወገርቡ ፈጥፈጥ ቤለ። እግሉ ዲብ ሚዳን ጀላብ ሕርየት ለትሰበለው ሐው ወሐዋቱ እንዴ ፈቅደ ህይ ሸዑሩ እግል ልራቅብ ኢቀድረ። “ምን ኢጣልዩ እግል እናድል መጽኣኮ ዲኢኮን ጀላብ ሐዳርዬ እንዴ እቤ ለጸብጠ ዐልኮ ሕሳል ንዳል ተረግ ይኣብል። ረአይኪ እሊ ገብኡ ምንገብእ ህይ ደሐን ትትሌኪ” እንዴ ቤለ ምን



ምናድል አረፋይን ሓቆ ሕርየት


ከርቱም ወረቀት ሕድጎ እንዴ ክትብ ነድአ እተ ወእባሁ ምን ከርቱም አሰክ ነቅሓሁ አቅበለ።

አረፋይን ምን ሱዳን ክምሰል አቅብለ ወጀማዐቱ እብሉ ዲብ ኢጣልዩ ለዐለት እሲቱ ክምሰል ትሰአለው። ሃድእ ዲብ እንቱ “እሲቼ ሐድገተኒ ተሐደግኩ” ዲብ ልብል ክምሰል በልሰ እሉም። ህቶም ህይ ሙሽ እናስቱ ለሐሐድግ ከፎ እሲትክ ተሐድኸኩ?” ዲብ ልብሉ ትሰአለው። አረፋይን አይመ ሃድእ ዲብ እንቱ። “ገድም ጀብህት ሸዕብዮት መሳዋት ትቤ ኢኮን። እናስ ሐቆ ለሐድግ እሲትመ ኖሰ ተሐድግ” ዲብ ልብል እብ ደአል በልሰ እሉም።

ሐቆ እለ አረፋይን ምሰል ዲብ ዋልያን ለዐለት ሐማሁ ክምሰል ተሓደገ ሐቆ ቅሩብ ዕንታቱ ምን ተክአ አሰክለ መጥሩ እንዴ ገብአት ዲብ ብሩድ ወሕፋን ዲብ ተኣቱ ጀላብ ወጠን ወሸዐብ ትናድል ለዐለት ምናድሉት ነብያት አፈወርቂ እግል ለትቃምት ላብድ ገብኡ። ለእብ ስልሰለታይ አሰሉል እንዴ ትመርከዝ ምሰል ነብያት ለአትመመዩ እብ ዕላቀት ለልትአመር ሕዳይ ሰውረት አትመመ። እብሊ ህይ ክምሰል ክለን ነአምሩ ሐቆ ሕዳይ ህዳይ መጽእ። ህዳይ ሰውረት ላኪን እብ ገበይ መስኩሊን ለልትቀረርቱ። አረፋይን

ሻማት ሐዲሰ ምሰል አነ እግል ዐጃ እንዴ ትቤ ለናደለት ምናድሉት ነብያት ዝያደት ዲብ ልቡ አነን ጸብጠት። አይወ አነ እግል ዐጃ!

አረፋይን ዕላቀቱ ምሰል ነብያት ክምሰል አትመመ ወልሰዕ ዲብ ህዳይ እንዴ ኢበጽሕ። ሐቱ ደርቦት ራድኡት ዲብ ሸዐብ እግል ልኮፍል እንዴ ትበህሉ። አሰክ አግረዕ ክምሰል ትከራቱ ወቀዩ እንዴ ኢለአትምም ሱድፊት ለኢትጸበረዩ ሻፍግ ጀዋብ እት ወግሬት እግል ልምጸእ ክምሰል ቡ ለተሐበረዩ። ትተላሌ...



3^ይ ወናይ ደንበክ ክፈል
ኪትባይት፡ ናጽነት አፍወርቂ

ህጅክ ምስክ ወከት - በኪ



ምናድላት ፋዋን መ/ዐሊ ምስል ዐይላት

ጥያራት እብ ለክፍ ልብክ ሰበት አብደሃ ዲብኑ ምድር አስክ ጸልምት እግልክ ወስ እግል ኒዳ ኢቀደርኩ። ረጅም ክቡድ አስለሕ፡ ጥያራት ወሐፋነት ምድር ሕድ እንዴ ሰደ እትኩ አርደት ገሀር ገብአት። ሐቀ ሳዐት ሰማን አልዕሸ ምድር ሰኒ ክም ጸልመታ ቱ ሸቅል ለአንበትኩ። በጣርያት እንዴ አትባርህን እግል ከደን ትዘረኡኝ ዲብ። ምጀርሒኝ እንዴ ሐደግክ ሰበት ይእንሰኩ። ላሊ እብ ግዲደ ምጀርሒን እት ነሐዜ ላሊ ከረበ ትመዩኒ።

“መልህምኩም አንፋር ውሕደት ዐመልያት-ጅረሕ ሕኒ። ሕያይ ለሀለ ምንኩም ክርን ሊዴ እግልክ! እተዩ ክም ሀሌኩም ሐብሩኝ” እት እንብል፡ ምጀርሒን ነሐዜ ትመዩኒ። ሐሊት ለረክበው ክርን እት ወዱ እግልክ ወደሞም ለትነጠፈ ምኖም ህዩ እተ ምውዳቅም ራግጾ ዐለው።

ሕነ ድሀር ክርን ጥርዓን እግል ነኡተንሴ፡ ወለሰራይር፡ ሌመት ወለትፈናተ አክራን ለወዱ ሔዋናት ከደን እትጀህን እት ለአበዱ ምኒን ላሊን ገብአት። ቀደም እንዴ ጸንሐኝ ግረ፡ ድማን እንዴ ዐልኝ ድገለብ፡ ለመሓዝ ኬን ወእንሰር ሐረሰናህ። ደለ ረከብናህ ህዩ፡ እብ አግማል አው እብ አዱግ ምስል ሽዑብ እነድኡ። ላሊ እብ ተማመ ለተርፈው ምጀርሒን ነሐዜ ትመዩኝ” ክም ትቤ ወለት-ዐሊ፡ ለዲብ ደንብ 1990ታት እመር ለዐለ ፊልም ታይታኒክ ትረኡኒ። እግል መርከብ እግል

ልርድኦ ለመጽአው መንግሥት-አርወሕ፡ በጣርያት እንዴ አብረህው እት ምሒጥ አትላንቲክ እብ ፊስካት ወመብረህት አረይ ብቅት ለገብአው ለሐዙ እት ህለው ትካየለ እግልዬ።

“ከረ ዶክተር ዐንዳት” ክም ትቤ ወለህጅክ ክም አተላሌት ቱ ለአንተብህኮ ዲብ።

“እት ወክድ ሐርብ ዶክተር ዐንዳት እብ ብጣሩ ልውዕል ወልትመዩ ዐሊ፡ አግሬሽ (ቦኒ)፡ ለገሰት-አኒሰቴዝያ (በንጅ)፡ ላሊ ወአምዕል እብ ግዲደን ብጣርም እት ሸቅል ጽሙዳም ልውዕሎ ወልትመዩው። አርት ጅሮሕ ሰጃያት እንዴ ወርኪክ ምኑ ወደም እንዴ ሀብካሁ፡ ቀደም አስክ ዕያደት ትሳርሐ፡ አርወሐቱ እግል ተአድምን እሉ ወጅብ” ክም ትቤ፡ ህግዩ ምነ እንዴ አዝመት እት ዝክርያት አቱት። እበ ሸባክ አስክ ነሳፈት ረያም ልእኩቱ ለዐለት ዕንታተ፡ እብ ሽዑር ምስል አስተሸህደው መልህያመ ለአትዋጀህ ለዐለ መሰል። እተ አካት እት ለአፋዝዝ ዩብሰ ወእት ዝክርያት ሽዑር ቀሪ አትመሰዩ። ለሓለፈቱ ሄራር ወተዩልሉ ክም ቃልዐት ሐለዩ መሰለኒ ገጸ ትቀርጠኒ። እተ ገጸ ህዩ ገሌ ሸይ ትቀርእ።

“ወለት-ዐሊ” እንዴ እቤል፡ ዲብዬ ክም ተአቀብል ወዳክወ።

“እለ ኩለ ርሕኪ ለወፊኪ እለ ሰውረት ተዐወተት ክም ትበህለ ሚ ትሰምዳኪ? ለዶል ለህ እተዩ ዐልኪ ገብእ?” ደርብ ሕድ

ትሰአልክወ። ደምኪ ወለሀበትኪ ብላሽ ኢትከዐ፡ ለትትሐበኒ እቡ ድኢኮን ለትሐዝኒ እቡ ኢኮን እግል ኢበለ ምን ሐዜኮ ቱ።

ወለት-ዐሊ እብ ሸፋግ ኢበልሰት እግልዬ፡ እብ ሐረከት ሃድኦት፡ ረኣሰ እት ነክንክ፡ “ሕርየት!” ትቤ ወእብ ሐዲስ አስቀበት። ተፍኪረ እንዴ ሐያየበት ህዩ፡ “እት ጀብህት ሐልሐል እብ ክቡድ ክም ትዘበጥኩ፡ ወሰብሮ እት ውረክ ሰበት ሳደፊ። እት ሰነት 1988 ግረ ዲብ እስብዳልየት መርከዝዩት ተንዝም (ዐሬርብ) ቃብለት ዐልኩ። እት እስብዳልየት መርከዝዩት መደት ረያም ክም ረገድኩ፡ እንዴ መስክንኮ እብ ክልኦት ምርኩሽ ቱ እትሐረክ ለዐልኩ። ሐቀ እለ፡ ምንለ እምበል እስትሸሃድ እትፈንተዩ መስለኒ ለይዐለ ክፈል ዴሽ 61 ተዐዘግኩ። እት ደንብ 1988 እት መሕበር አዋልድ አንሳት አስማጥ ትወዘዐኩ። እት ሰነት 1990 ውሕዳትን እግል ዐመልየት ፈንቅል እት ልትባገሱ፡ አነ ምን መሕበር አንሳት ዲብ ክፈል ዴሽ 90 ክተትኩ። ወዲብ ዕያደትለ ክፈል ዴሽ ትዩመምኩ። አክረቱ እበ ክብድት ምዝባጩ ሰበት ኢቀደርኩ፡ እት ዕያደት አምን-ተንዝም (ሓለዋ-ሳውራ) ትወዘዐኩ። አካነትን ህዩ ዲብ ሕሸክብ ዐለት።

እት ሄለል ሰነት 1991፡ መልህይ አልአሚን መሐመድ ሰዲድ እግል እተ ባካት ለዐልክ ውሕዳት ጀምዳኒ።

“ግድም ግረ እለ፡ እቅባለት ምን አፍያት አስመረ ኢህሌት። ክለኝ አስክ ጀብህት እማም እት ሊክ ወጠን-ክተት እግል ኒጊስ ቱ” ቤሌኒ። ለበዝሐ አሸቃል ከልፍየት እብ ምጀርሒን ወምስኩናም ቱ ገብእ ለዐለ። ብዝሓም ምኒን ህዩ ከተው። እት መደት ቅድም ዝቡጣም ለዐለው ምስኩናም፡ “ሕናመ መቅደረት ብኒ፡ ጸልዕኩ ሐያ እግልክ!” እት ልብሎ፡ አስማየም ምስል አስክ ጀብሃት ሐርብ ገይሶ ለዐለው እግል ልትነቅም ተሐት ወለዐል ቤለው።

ሚ ዶል ክም ቱ ኢደሌኝ ድኢኮን፡ ተንዝምኝ ናይ ደንበክ ሐርብ ክም ወዴ ሸክ ኢዐለ እግልኒ። አሚን ዓም ጀብህት

ሸዕብየት ተሕሪር ኤረትርዮ፡ መልህይ ኢሰያስ አፍወርቂ ሕርየት ኤረትርዮ ምን ሰነት 1991 ክም ኢትሐልፍ ወአውረሐት ሌጠ ታርፈ ክም ሀለ እት መቃበለቱ ሐቱ ሻሬሕ ዐለ። እለ መርሐለት ካቲመ እተ እግል ልሻርክ ለኢሊሐዜ የዐለ እትኒ።

አኒ፡ እብ ሐያት ወለቼ ሐራሰ ዐልኩ። እብ ሰብብለ ምስክናዬ እብ ዐመልየት ሰበት ወለድኩ፡ እግል መርዲት እንዴ ትበህሉ፡ ቀደም እትዩቼ እት አካን ሐራሳት፡ እት ውሕደትን ዐልኩ። ሐራሰ ሰበት ዐልኩ፡ እት ሐን-ምድር ንሕሰ (አንደርግራውንድ) ካረት እት አኒ ከረ ልዩ፡ አምለሰት ወደክቶረት ኮሎኔል ፋና ለልትበህለ መሳኒቼ ሳርያኒ ወራዕያኒ ዐለዩ።

ጅምዐት ክርን ገቢል እት እንታቤዕ ወዐልናህ። ለረከብናህ ሐብሬ ሰበት ይዐለት ላኪን ትሻቀልኒ። ክምለ እት በዲርኩ ምስል መልህያምን እት ጀብህት-ሐርብ እንዴ ገብአኝ ተዩልል ምን ቅሩብ እግል ንድሌ ኢቀደርኩ። በክትኩ፡ እት ከልፍየት እንዴ ተረፍኝ ክርን ገቢል አተንሳይ ሌጠ ገብአ። ለተአለምቤ ዐለት እግር መስክነት! እብ ሸቀላት ትመሀጽኒ።

ምድር ክም ጸልመተ፡ ዐንዶም መሓሪ ለልትበህል መልህይኒ፡ ራድዮ ምን እዝኩ እንዴ ኢከሬ ውዕል ሰበት ዐለ፡ “ዐውቱ እግል ገቢል፡ ዐውቱ እግል ገቢል!” እት ልብል መጽኢኒ። “መልህያምን አስመረ አተው፡ መልህያምን አስመረ አተው!” ክም ቤሌኒ፡ ህቱ እባሁ እት ቅፋል አተ ወሕናመ ፈዘዝኩ።

“ብእሼ ምስል ክፈል-ዴሽ 85 እት ቅዋት-ሐርብ ቱ ለዐለ። ከበር ወለድዬ የዐለ እሉ” ክም ትቤ ወለት-ዐሊ፡ እግል ቲበለ ተሐዜ ለዐለት ሂገ ምነ ከረፍክወ።

“ወለት-ዐሊ፡ ብእሰኪ እት ሐርብ ቱ ለዐለ፡ እንቲ ህዩ ሐራሰ-ብክር ዐልኪ። እት ሐያትኪ እግል ሰልፍ ኢነትኪ፡ ምን ወለት እት እም ተዐዳኪ። “ዐብዱ እድሪስ ለአቱ ገብእ?” ለልብል አሰፍ በይኡኪ ገብእ ለዶል ለህ? በህለት፡ ወለትኪ ገጽ አቡህ እንዴ ኢትርኡ



ፋዋና መ/ዐሊ

እግል ኢትንበር። ወእንቲመ ንዩት ሻማትኪ እግል ኢትትካረም።...” ሽዑረ እግል እቅረኢ ለኡብሉ ባዲ ምንዬ ዲብ እንቲ፡ ሰኣላት እቡ ሻወጥክወ።

ፋዋና መሐመድ-ዐሊ ሰሕቅ ወዴት እግልዬ። ልእክት ሰሓቀ እንዴ አቅመትኩ፡ ለኢወጅብ ሰኣል ስእልተ እግል ይህሌ ተአሰፍኩ።

“ተርጀመት እስትሸሃድ ፍህመተ ይህሌኪ” ናይ ዕሽረት ህግዩ እበ በልሰት።

“እስትሸሃድ ዲ ሞት ቃልየት ቱ ማሚ! ሐቱ ኢነት ወእግል ዲመ ምን ገጽ ምድር መትሸራብ። ዲብ መደት ንእሸኩ፡ እብ ምራድ ኖስኩ፡ ፍዘ ገቢል ለገብእ ሰበት ቱ ላኪን ሕሸመት ነህይበ” እቤ እብ ልብዬ። በሊስ እግል እስመዕ ህዩ አስከ ገንሐኩ።

“ሕነ እግል እስትሸሃድ፡ ክም እለ ምሮት አትሌት ርያዲ ቤሉ አውመ ዐጀላቲ ቤሉ፡ ልሰዔ ውዕል እንዴ ዐለ ሰርገል ዶል ረክብ ፋሽ ለልትሰምዑ፡ ክምሰልሁ ነዐልበ። ኢሐሴ እግልኪ! ሐር ህዩ ምን ርሕዬ ወለዐል ለእፈትዩ ወኩለ ሐያቼ ለትበረዐኮ እሉ ተንዝም ሰበት ዐለ እልዬ፡ ለናይ ደንበክ ሀደፍዬ ዐውቱ ተንዝምዬ ቱ። አላፍ ምጀርሒን ወሹሀደኢ እርኡ ሰበት ዐልኮ ህዩ፡ እብ ወድ እድሪስ እግል እብህጅ?” ቲለተኒ። እለ ዶል እለ፡ ለእለ እብለ በዴት ምንዬ።

“አማን ቱ፡ ምስል ዐብዱ እድሪስ እት ማርሰ ሰነት 1986 እት ግርማይካ ተሃዳኒ። ምን ፈታዬ ወኪን ላኪን፡ መልህዬ ቱ። አስክ ሃድል ዮም ምን ልብዬ እፈትዩ። እግል ኢለአስተሸህድ ምንዬ ላኪን ይእፈርህ። እግል ኖሼ ፍዘ ገቢልዬ እግል አስተሸህድ ዲብ ሐዜ!” ክም ቲለኒ፡ ክጅል ትሰመዐተኒ። እግል እለ መንበረት፡ አነ እብ ዕን አርወሐት፡ ህተ ላኪን እብ ዕን ደሚር እንርእየ ለዐልኝ እንዴ ገብእ ትሰምዳኒ።

ሀጅክዬ እንዴ አትመምኮ ምነ ቤት እንዴ ይእፈግር፡ ሐያት ወለተ እተ ገጩ ትወሳወሰት። “ከግድም፡ እግል ሐያት ለሰነት ሕርየት፡ ዲድ ሕርየት በኪት ቤለ እግልዬ።” እቤለ ከትሳርሐኮ ምነ።

መዳግማይት፡ ፋዋን መሐመድ ዐሊ



ሕፍዘት ወጠወርት ብዝሒ ክልቀታት

ብዝሒ ኣራውሕ በህሉት ምን ለኣናእሽ እብ ዕንታት ለኢልተርኤ (ኣሚቤ ባክተርያ ውበዕድ) እንዴ ኣንበትክ ኣስክለ እት ማይ ወምድር ለኑብር ዐባዩ ወገዛይፍ ክልቀታት ዓሰ፤ ሌመት፤ ሐሽራት፤ ነባት (ዕጨይ) ሰራይር ውበዕድ ለሽምል ፈሀምቲ።

እት ዐድነ ሐድ 3 ኣልፍ ኪሎ መትር መረባዕ በህሉት እግል ገሌ ክፋል ኣውሎታት፤ እት ኣጥራፍ መሓዛት ምፍጋር ወምውዳቅ ጸሓይ ቀላቅሎታት ለልትረኩብ ነባት ወዕጨይ ከምሰልሁመ ዕጨይ ሾረ ናይ ግንራራብ በሐር ለከምክም እብ ዕጨይ ለገምላቲ። ምን እሊ ለሐድ 110 ኣልፍ ሄክታር ዕጨይ ወሐዋናት ከደን ለልትረኩብ ዲቡ እንዴ ትበህለ ለልትኣመር ጋምል ባካት ቅብላታይ ወግብለታይ በሐር (ሰሚናውን ደቡባውን በሕሪ) ቲ። እትሊ ባካት እሊ ሐድ 110 ኖዕ ዳይም ወለ ሰብክ ወሳግም ሰራይር፤ 98 ዐባዩ ወነኣይሽ ዕጨይ ወሃቡይ እንዴ ሐደግከ ለተርፈ ክሉ ዲብ ደረጀት ሰሪት ልትረኩብ። ህመም፤ ሐሽመ ከደን፤ ኣረውያታት፤ ነላት፤ ውበዕድ 20 ለገብእ ዓባይ ሐዋን ከደን ወነኣይሽ ክልቀታት ለኑብር ዲቡ ባካትቲ።

ምን ዐባዩ ዕጨይ ህዩ ለዲብ ሰሪት ለልትረኩብ ክም ወግሬ ወነረድ ለልትረኩብ ዲቡ ዓጋም፤ ጸሓት፤ ኩመል፤ ዓቅቤ፤ ቀግ ውበዕድ ልትረኩብ ዲቡ።

ዕጨይ ባካት መሓዛት፦
እት ቀላቅሎታት ምውዳቅ ጸሓይ እብ ዓመት መሓዛት ጋሽ-በርክ ወዓንሰበ ህዩ እብ ፍንቲይ ዓርኮካባይ፤ ቀግ፤ ቅሰላ፤ ቀረጽ፤ ሐመር ወምበል ለልትረኩብ ዲቡ 25 ለገብእ ኖዕ ዓባይ ዓጨይ ውበድ ኖዕ-ኑዑ ንኣይሽ ዕጨይ በቅል። እትሊ ለትሽረሐ ባካት፤ ኣራባት፤ ሐረውያታት፤ ወሓረምዝ ለልትረኩብ ዲቡ ሐዋን ከደን ወ91 ኖዕ ሰራይር ወሌመት ልትረኩብ።

እምበል እሊ፤ ዲቡ ክፋል እለ ቃረት ኣፍሪቅዩ ወእብ ፍንቲይ እት ኤረትርየ ክም ኣግደ ዕላመት ግንራራብ መሓዝ ጋሽ ክምቲ ለልትኣመር፤ ብቅት ናይ ሰሪት እግል ኢትሳድፋ ብዙሕ ጅህድ ገብእ እሉ ለህለ ኣረምዝ ቲ። ዲብ ወክድ ቀዲም እበ ለገብእ ድራሳት፤ ክመ ለኣሸሩ፤ ምስል ክሉ እግል

ሕፍዘቲ ለገብእ ጅህድ፤ ዲብ ዓድነ እብ ለትፈናተ ኣሰባብ ክል ሰነት እብ ተቅይም 3 ኣረምዝ መይቶ። እሊ መሻክል እሊ እግል ኣብጠሮት ሕዱድ ቃትረ ሐረምዝ ለወድሕ ክራይጥ ክጠጥ ምንመ ህለ፤ እት ፍንጌ ኣረምዝ ወሐረሰቶት ለህለ ክላፍ ዳይም ሐል እግል ልርኩብ ላኪን ንሳዕ እግል ልትሸቄ ዲቡ ለቡቲ።

ዓርኮካባይ እት ኣጥራፍ ዓባይ መሓዛት ጋሽ በርክ ገሌ ክፋል ኣርድ ደንክል፤ ምን ለበቅል ዓባይ ዕጨይ ምሮቲ። እሊ ዕጨይ እሊ ምን ኬን ግርመት ኣርድ፤ ትሩድ መስኩብ ሐዋን ከደን እብ ዐቢሁ ህዩ መትሸርሻር ትርበት ዲብ ዳፍዖት ዶር ዐቢ ለወቄ። ዕጨይ ዓርኮካባይ እምበል እሊ እት እጅትማፒ ወእቅትሳዲ መናበረት ውላድ ኣዳም ዲብ ኣርህዮት ዶሩ ውቁልቲ። ካዕሌሁ እግል ጥናብ ኣብያት፤ ፍዕሎ ተትብ፤ ቅለው፤ መሻርፍ ወጀናቢል ውሓብል ፍሬሁ ህዩ ክሉ ክመ ለኣምሩ እግል ነብረ ኣዳም ወንዋይ፤ ግንዳዩ መ እግል መሸቀይ ኣብያት ውበዕድ ከደማት ልውዕል። እሊ ብዙሕ መንፈዓት ለቡ ዓርኮካባይ እትሊ ወክድ እሊ እብ ለትፈናተ ኣሰባብ በህሉት እብ ነድ እሳት፤ ኣርሓቦት ኣርድ ሐርሱ መሸቀይ ኣብያት ወዕጨይ እሳት እንዴ ትበህለ፤ እብለ ኣኬት ገበይ እት ልትቡተክ ወኣካት እብ ሴሰባን ውበዕድ ዕጨይ ዲብ ወርሰ ልትርኤ ህለ። እሊ ለክልቁ መሻክል ህዩ ሀለዮት ዓርኮካባይ ዲብ ዐድን፤ ምን ዲብ ደረጀት ሰሪት ህለው እንዴ ትበህለው ሰጁላም ለህለው ዓጨይ ወዲሁ ህለ።

ቀጠቅጥ ወነኣይሽ ዕጨይ፦
ሐድ 14 ኣልፍ ኪሎ መትር መረባዕ ምን ኣርድ ኤረትርየ ዐድን፤ ዓቅብ ለመስል ቀጠቅጥ ወነኣይሽ ዕጨይ ለትገልበባቲ። ምን እሊ ለሐድ 7100 ኪሎ መትር መረባዕ (50%) ዲብ ቀላቅሎታት ምውዳቅ ጸሓይ ለልትረኩብ ዲብ ገብእ ጸለም ቀዳድ፤ ገምሮት፤ ሓቅ ውበዕድ ልትረኩብ ዲቡ። እምበልሁ እትሊ ኣርድ እሊ ብዙሕ ንኣይሽ ወዓባይ ሐዋን ከደን መ ልትረኩብ፤ ሓርማዝ ክመ ዲብ ለዐል ለትሽረሐ ዲብ ባካት መሓዝ ጋሽ ወሰቲት፤ በህሉት ሃይኩት፤ ኣውጋሮ ወኣንቶሬ ዲብ ለልትረኩብ ደዋሒ ልትረኩብ። እሊ

ባካት እብ ዓመት 47 ኖዕ ዕጨይ 15 ኖዕ መጥብዮት ሐዋን 87 ኖዕ ሰራይር ክምኩም ልትረኩብ።

ብዕድ እብለ መናሰበት እግል ልትሸራሕ ለቡ ‘ዲው’ ለልትበሃል ሐዋን ከደን ቲ። እሊ ሐዋን እሊ እብ ዓደድ ሐድ ልግበእመ እንዲኢኮን ዲብ ቅብለታይ እንክር ምውዳቅ ጸሓይ ኤረትርየ ክም ልትረኩብ ተኣክደ ክህለ። ትሩድ ድራሳት ሐቅ ገብእ እሉ ህዩ ዲብ ሕፍዘቲ ክም ሰዴ ልትኣመር።

ሰዕር ወሐጨር ዕጨይ፦
እግል ቀላቅሎታት ምውዳቅ ጸሓይ ውሓሲያት ምፍጋር ጸሓይ ለሽምል 63% ምን ርሕብነ ኣርድ ኤረትርየ ሰዓር ወሐጨር ዕጨይ በቅል እቲ። ጎምሮት፤ ሰሮብ ወለትፈናተ ኖዕ ዕጨይ። ምን ሐዋን ህዩ ኣድግ ከደን፤ ኣራባት ወኣክሪት ለመስል እምበልሁ ለትፈናተ ሰራይር ወሌመት ልትረኩብ ዲቡ። እሊ ህዩ ዲብ ደሓን ሓለት ክም ህለ ልትሸራሕ።
ክፋት ሽብህ ባዶብ፦
እሊ ባካት እሊ ሰኒ ደቡቡቲ ክል ሰነት ሐድ ዝላም ለረክቡቲ።



18,265 ኪሎ መትር መረባዕ ርሕብነ ለቡ 15% ምን ዕሙማይ ርሕብነ ኣርድ ኤረትርየ ከምክም። ሐሲያት ምፍጋር ጸሓይ ወገሌ ክፋል ቅብለታይ ምውዳቅ ጸሓይ ህዩ ሽምል። ለዐበ ክፋል ሕኔት ዕጨይ፤ እኩብ ትርበት ልትርኤ ዲቡ። ጨው ወዩባስ ለልትሐመል ክም ዐቅቤ፤ ያበል፤ ቅሰለ ዐዳይ ውበዕድ ህዩ በቅል ዲቡ። ምን ሐዋን ከደን መ ሀበይ፤ ሓሻይል ወኣክሪት ልትረኩብ ዲቡ።

ናይ ሐርሰ ሐያት ወክልቀታት፦
መንበረት 80% ምን ሙጅተመዕ ኤረትርየ እት ሐርሰቲ ለልተንከብ። ከክም ለመዱ ህዩ ዲብ ባካቲ እበ ረክቦም ክም ኣድግ ወበቀል፤ ገመል ውበዕራይ ለመስል ኣንወዮት ዐድ እንዴ ትነፈዕ ነሻጣት ሐርሱ ከድም። ማሼሊ፤ ሽዒር፤ ሽንራይ፤ ጣፍ፤ ዕፋን ውበዕድ ገሌ ምን ኣግደ ዘርኡቲ። ኣሳስ ማሼሊ፤ ሽዒር ወሽንራይ እት ኤረትርየ ክምቲ መ ልትሸራሕ። ድራሳት ክመ ለኣክዱ ዲብ ዐድነ ኣሳስይን እንዴ ትበህለው ለልትሸርሐ 22 ጅንስ ማሼሊ፤ 8 ጅንስ ዕፋን፤ 6 ጅንስ ሽዒር፤



5 ጅንስ ጣፍ ውበዕድ ክም ህለ ልትሸራሕ።

እብሊ ለ 90% ለልትሓረስ ኣምዳር ዐድነ እሎም ለትሸረሓው ኣዝረኣት ቅርጡጥ ወዜይድ ልትዘራእ። እብ ምእታይት ልትርኤ እት ህለ ማሼሊ 46%፤ ብልቲግ 12%፤ ሽዒር 10%፤ ጣፍ 6.5%፤ ዳንሰ 5.3%፤ ዕፋን 4.7%፤ ሽርናይ 4.5% ልትዘራእ። ምን እሎም ዐለስ ለልትበሃል ጅንስ ሽርናይ እብ ፍንቲይ ዲብ ደረጀት

ዐድነ ዓባይ መደረት እብ ኣጅረዮት እተይ ለልኣነቅስ ዝያድ 70 ጅንስ ሃረም ክም ህለ ልትሸራሕ። እግል ኣብደዮቲ ለትፈናተ ኣዳም ለሸቀዩ ኪማእያት ረሸረሾት ህለ። ለናይ ረሸረሾት ሸቁል እግል ድዋር ወክልቀታት ደማንት እበ ለልሃይብ ኣግቡይ እግል ልግባእ ላኪን ክቡድ መትሓፋዝ ለትሐዜ።

ብዝሒ ኣራውሕ ግንራራብ በሐር ወጀዛይር፦

ኤረትርየ እብ ለትፈናተ ኣራውሕ ርዝቅተ። ወረይም ግንራራብ በሐር ለትመልክ ደውለት ቲ። እብ ኣሳስ እሊ ህዩ ለረይም ግንራራብ በሐር ወጀዛይረ እብ ኣራውሕ ሳቦም ክልቀታት ርዝቅ ክምቲ ልትሸራሕ። ዲብ በሐር ኤረትርየ ሐድ 1250 ጅንስ ዓስ ወ5 ጅንስ ጋብሌ በሐር 1 ጅንስ ወኣት በሐር 220 ጅንስ ዕንቦባታት በሐር፤ ሓት ኣቡሰላመ፤ ለትፈናተ ሰራይር፤ ለትፈናተ ዓጭም ለኢኣለቡ ኣራውሕ ክልቀታት ልትረኩብ። ነባታት እበ ከሰስ ህዩ 12 ጅንስ ሰዓር በሐር፤ 3 ጅንስ ሾረ ለትፈናተ ንኣይሽ ኣራውሕ ዳይም ወለሳግም ደወርህ ማይ ልትረኩብ። እምበል እሊ ዲብ ዐድነ ሰለስ ጅንስ ሾረ ህለ። ዕጨይ ሾረ መሪር ማይ ናይ መትሐማል መቅደረት ሰበት ቡ ዲብ ዐቦት እቅትሳድ ሐቲ ደውለት ዛይደት ዶር ለኣወቄ። ገሌ ምን መናፍዕ እሊ ዕጨይ እሊ እግል ሸርሐት፤ መዕረፊ ወመትፋሬይ ለትፈናተ ዳይም ወሰብክ ሳግም ሰራይር በሐር፤ ነብረ ኣንወዮት (እንሰ፤ ዓጣል ወኣባግዕ ወኣዱግ) መትፋረይ ለትፈናተ ሐዋን በሐር ዓሰታት ውበዕድ፤ መሸቀይ ኣብያት፤ መዳፈዓት መትሸርሻር ትርበት ግንራራብ በሐር ውበዕድ ለኣወቄ። ኣክል እሊ ለገብእ መናፍዕ ለቡ ዕጨይ ሾረ፤ እብ ንቁስ ራዐዮት ወጽብጠት በዴ ሰበት ህለ እህትማም እግል ልግበእ እሉ ወጅብ። ዕጨይ ሾረ ዐድን፤ ዲብ ባካት ማርሰ ሙባረክ፤ ማርሰ ታክላይ፤ ጀዚረት ሐሬክ፤ ዳህላክ፤ ሽብህ ጀዚረት ቡራ፤ ሙሰራ፤ ባካት ዐሰብ፤ ራሰ ሓፈሌ (ጢያ) ሳርይተ ኣስክ ዕዲ እብ ዓመት ሐድ 70 ኪሎ መትር መረባዕ ለከምክምቲ።



ሸባብ

ነጃት ዑስማን



ተረት አጅያል ሕርየት እት ዐማር ወጠን

ሰኒ ልትወረስ ሀላ እብል። ምን ኢልትወረስ የም ዲብ እለ ደረጀት ወኢበጽሐኑ። ክሉ ሳድፊን ለሀላ መታክል። እብ ፈድል እሎም የም ለሀላው ወዲብ ሳወ ለትደረበው ሸባብ ቱ ልትጋበህ ለሀላ። ቀደም እለ ለዐለ ታሪክ ሐጠር ወፈራሳት ላቱ ዲብ አካኑ ሳብት ሀላ። እሊ ለገብኦቡ ሰብብ ለጅን ምን ልትወለድ ሀጅክ እሙ ወክቡሁ እብ ንዳል ወታሪክ ሰበት ገብኦት። አፍ ዶል ፈቴሕ ታሪክ ሚቱ ወእብ ንዳል ማጽእ ወደውለትመ እብ እስትሸሃድ ማጽኦት ከምተ ልፍህም ወደሌ። ክምሰልሁ ምን ገኦቱ ለታሪክን ትወረስ። አዜ ክምሰል መሰል ለእንርእዩ ህዬ ጅን ንኡሽ ረኣዩ። ሓባር መንዳረት ቀዩሕ ፅላመት ናይ ሚቱ ዶል ትብሉ። ፅላመት ደምቱ ልብለክ ወእብለ እለ ወጠን እለ እብ ዐውል ቃሊ ማጽኦት ከምተ ለኣክድ እእግልኩ። አነ መደት ሐቱ ምስር ጋይሰ ዐልኩ። ክለ ዲቡ ህለው ኤረትርዩን ዲብ ጃልያት እንዴ ትክምከመው ንዘማም ረኤኮሆም። ክአዜ ወለ ካርጅ ለገሰው እእግል እለ ቃልየት ወጠኖም ርሱዓመ ክም ይህለው ለኣርኤኩ። እግለ ዲብ ካርጅ ለኩብሮ ኤረትርዩን ተዐቢኦት እት ወዱ እብ ማሎም ወኣፍካሮም ዲብ መጦር ሽዕሪም ወጠኖም ሳምዳም ቶም። ከፍቲ ወጠኖም ክም ህሌት እቶም ለኣርኤኩ።

እተ ዝያረፎ ምስል ኦሮት ምስሪ እትሃጀክ ዐልኩ። ከሐሬ ለዕመፎ ክም ረኣ። “እንተ ሱዳኒ እንተ ሙሽ?” ቤሌ። “ለእ አነ እርትሪ አነ” ዶል እቤሉ። ምን ቅያሰ ወለዐል ትረይሐ እእግልዬ። ከሚ ቤሌኒ እንቱም ኤረትርዩን እምበል ትሸቁ ኢትረምቆ ወማል ጠርኩም ኢትገንሖ ወለገብኦ ሐዋን ኤረትሪ ኢረኤኩ። እንዴ ቤለ ዳግም እእግልዬ ዐለ። ከሸባብ ኤረትርዩ ዲብ እለ ጌሰው ወጠንየቶም እብ ቀላል ኢለኦሞ።

ሰኣል፡ ሸባብ ወጠን ምስል ዶል ነኣትጸብጦም ህዬ አከፎ ትሸርሖም?

በሊሴ፡ ወጠን እምበል ሸባብ፡ ወሸባብ እምበል ወጠን ለኢገብእ ጋርቱ። ክልኢቶም ዲብ ሕድ ሕገዛም ሰበት ቶም፡ ወጠን ወገርህት ሐቱቶም። ገርህት እእግል ትርኩብ ምን ተዐቅቡ፡ ወጠንመ እብ ሰላም ወመስኩብት እእግል ትንበር እተ ዔቅቢት ፈዳቢት ተሐዜክ ወእብ ፍንቱይ ምስል እሊ የም ለሀላ ተዋልል ናይ ኢሰላም ወኢሐርብ ውሕደት ተኣትሐዜኑ። ተብዐትን ወኣንሰኑ። ንኡሽከ ወዐቢን ምስል እንዴ በጠርን ክመ ታሪክ ለቀዳም ዶል እንደግም ሐበን ተ። ውላድን ምኒን ክምሰል ለሐይሰ ህዬ ኣመርን ወተኣክድኑ። የም ለሀላ አጅያል ሰበት ተዐለመ ምኒን ወለዐል ጋብኣም ቶም። የም ክሎም ሸባብን እንዴ ተዐለመው ክል ዐድ ከ ሐኪመ ወእስታዝ ምን ኖሰ ጋብእ ሀላ። ሰበት እሊ 30 ሰነት ለኣርኤኖህ ዐቦት ወተፅሚር ወጠን ቀላል ኢኮን። ዲብ ርዘቃት ለትበሀለየ ድወል እንዴ ኢትተንኩብ ዲብ ረሐ ደማነት እንዴ ወዴት እእግል መዋዋኒን ርሐም ለቀድሮቡ አሰሉብ እንዴ ትቀፍር ዲብ ደረጀት ሰኔት ባጽሐት ህሌት። ሸባብን ክመ ልሙድ ኣፍካሮም ዲመ ዲብ ዐቦት ለዋሌ ወደማን ወጠን ለለኣክድ ዶል ገብእ ለሄራር ገጽ ቀደም መለሀይን ገብእ። ለተጠውር ልትረኩብ፡ ለለሐሰብ ወምህመት ላብ ንቅጠት ዲብ እእግል ልረክዞ ምን ዋጅቦምቱ ዝያድ ክሉ ኣርዛቅ ዐድነ ልሰዕ ትምቱም ኢሀላ። ከእሊ ልጸበሮም ከም ሀላ እንዴ ኣመረው እእግል ረዩም ሀደፍ እእግል ለኣምሞ ህሌት እሎም። ሸዐብ ኤረትርዩ ዴሹ ወሽዕቡ ሐቱቱ። ክሉ ዔቅባይ ወጠኑቱ። ክል ኦሮት ለዲብ ሀላ እእግል ዐዱ ሌጠ ለዐቅብ ወእብ ወጠኑ ለሐሰብ። ሸዐብን ዲብ ክሉ ወጠንያይ አሽቃል ፊን ለኢለሐዜ ወእብ ውሕደቱ ወታሪኩ ዲብ ለሐሰብ ለኩብሮ ወእብ ሸዐር ወጠን ለለሀምም ሰበት ቱ ታሪኩ ፍንቲ ለቤላቱ ለልብል ረኣይ ብዬ።

ሰኣል፡ ዲብ ዐድነ ኤረትርዩ ለለኣትዐጅብ በራምጅ ዐማር ወጠን ሸቁይ ሀላ። ከእብለ መናሰበት መዕጸም ሸባብ እብ ከኣፎ ትሸርሖ?

በሊሴ፡ እብ አማን፡ መዐጸም ናይ እሎም የም ለሀላው ሸባብ እብ ቀሊል ለልትሸረሕ ኢኮን። እሊ እብ ደረጀት ወጠን ልትሸቁ ለሀላ አሽቃል ዐማር እብሎም ሸባብ ሕርየት ለእንቤሎም አጅያልቱ ልትሸቁ ለሀላ። ዲብ ክሉ መጃላት እበ ትወቀለት ደረጀት እምበል ሕላሌ ሸቁ። ከለ ሰብር ወክሃለት ወመዕጸም ክሉ ዋርሳሙ ክም ህለው ለተኣትክድ አማንተ። ሰበት እሊ ለእቡ ትሰኣልኪኒ ሰኣል ዲብ አካኑ ውሩሰ ወሳብት ክም ሀላ ለተኣሰብት ሐቂቀት እብ አማን



አሰይድ መሐመድሰዲድ ሐሰን ዐንፈረ

ሳብተት ህሌት። እሊ የም ዲብ ክለ ወጠን ልትሸቁ ለሀላ ከዘፍት ዶል ትርኤ ትርድት መቅደረት ወድ ኣዳም ወማሽጌሪቱ ልትከደም ለሀላ። ክሉ ከዘፍት ዲብ ዐድነ ኤረትርዩ ሸቁይ ለሀላ ብዘሕ ተዐብ ለሐልፈ ዲቡ ትሩድ መጃል ክድመት ቱ። ዝያድ ደሚር ለረዬሕ ጋር ሚቱ ዶል እንብል። ከመ በዲር ዲብ ዘበን ንዳል ለዐለ የመ ዲብ እሊ ለኣቱ ህሌን ወቅት ብነኣ ወተፅሚር ኣምበል ፈናታይ ክሉ እብ ሕበር እእግል ዐቦት ወመትቀዳም ናይ እለ ወጠን እብ ሕበር ልትሸቁ ሀላ።

ሕነ ሸዐብ ኤረትርዩ እብ ክሉ ርሕነ እንዴ ቀደርን ሀለዮትን ዲብ ዐለም እኩዳም እቱ ለህሌን ዘበን ዐቦት ወተጠውር። እሊ አጅያል ሕርየት እበ ዐቤት ወለ ሐሰት ደረጀት እግል ወጠኑ ለከድም ወዲብ ዐለም አካኑ ለኣትኣከደ ወኣትኣመረ። ወናይ መስተቅበል በራምጃቱ እንዴ ተለመ እብ ዐቦት ለኣሳድር ለሀላ ወእብ ሐበን ወሕሽመት ሰያደት ወጠኑ ለኣድመነ ዌርሳይ ናይ ሙናድል ቱ። ሕነ ለወርሱን ወዲበ ዐቤት መርሐለት ናይ ተጠውር እግል ለኣብጽሐነ ለቀድሮ። እሎም አጅያል እሎም ዝያድ እግል ለኣድመየ ዲብ ውርስ ታሪኩም ወዳዳቶም እብለ ሐሰት ገበይ ክም ወሩሱ እግል ኒዴ ዋጅብ ናይ ክል መዋዋን ከምቱ እግል ንትረሰዕ ኣለብኩ። ከእለ ገኦት ምን ገብእ፡ ምስለ ሀላ እሎም ኣምር ወጥወር ኣፍካር ዲብ ትወቀለት መርሐለት በጸሐ። ሰበቡ ምስለ ሀላ እሎም እብ ገበይ ዕልምየት ለራክባሙ ኣምር ዝያድ ኣምሮም እግል ወቀሎም ሰበት ሰድዮም ክል መዋዋን እበ ህሌት እሉ መቅደረት ምን ሸባብ እሊ ዘበን እግል ልዋመዕ ክም ኣለበ። እግል ነኣውርሱ ክምቱ። እግል ርሰዓም ህዬ አትፋቃድ ምህም ቱ። ሸባብ ህዩር እምበሌሆም ሴመ እግል ነኣውቁ ይእንቀድር። ሙናድል ግድም ክለ ለእማነት ዲብ ዌርሳይቱ ለከረየ። ከጀበእ እሊ ጸርኩም ቱ እንዴ ቤለ ሰለመዮምተ እለ ወጠን። ከጸር ጸርኩምቱ። ኢልክበድ እትኩም ወኢልቅለል እብሎም እግል እሎም ሸባብ መስተቅበል።

ትተላሌ....




አላህ! ለዘመን ገጹ ሐር እንዴ አሊአቀምት ልትሄቡብ ሀለ። ወክልመ ቀጹ ቀደም አሴረራተ ኩዲብለ ከልቅ ረቢ ለቤለየ ወለ ሐክመዩ ለአጀራ ሀለ። ወለ ዝሩፍ ክም ምራዱ ባድለ ወቃደረ ሀለ። እለ ህዬ ዶልክ ከምነ ነቢር ዲመ መሸገ ምን ገብእ ርሐ ለለአትሀምግ እብ ሐቲ ገበደ ተ። ገሌ ልትጀደድ ወገሌሁ ብሌ። ሰር አሮት ለሐዬ ወሰራመ መይት። ገሌህ እብ ሸቡት ፈ'ሬ ወለዐንብብ። ገሌ ህዬ ገንድብ ወአስክ አርደል አልዑሙር ገጹ ሐር ለአትቃብል። ገሌህ እብ ረቢ ለሀቢያተ ንዕመት ትፈርሕ ወትትለወቅ። ወብዕድ ህዬ ምነ እብ ምልሃሁ ለምም እቱ ለሀለ ፈነ ወቡቲክ ሰእየት ጠርዕ ወኢህ ልብል፤ እግል ዓይለት ብሻውሮመ ለዘመን እዴ ዋዲ ዲበ ዐለ።

ለእናስ ግድም ወድ ሕምስ ሰነት በጽሐ። ለገርቡ ሐምቀ ወለ ረአሱ ሸቢት ትዘረአት እቱ። ጅሃዝለ ተነፍሱመ ሐሳስየት ሰቡት ወሰከ ህግያሁ በዝሐት ከእግለ ዔቅብት ልትናሀሮም ወለ ከተበት ህዬ ለአመሸሽ ምናም ገበአ። ምናተ ህቱ ክመ እተ አብዕረት መሰር ጸናጊህ ወለሐናዴ እት ኢኮን ብዝሕት አዝየት አለቡ። እሊ ህዬ ምነ ሞባይዑ ለዘመን እግል ልቀደረን ለኢቀድረ ክልኤ ስፋት ታርፋት እሉ ሰቡት ዐለየ ቱ። ለፎጃጃ ወለ ከብዱ ለባርሀት። ህቱ ሙፈትሽ ዓም ናይ ሀረም ኹፋ ቱ። ስሙ እት ሰሜ ለሺመቱ ወለ አሳሚህ ገለዱ እንዴ አሊሓብር ለነቅሙ ያወይሉ። ህቱ ምን ህግዩ እብ ርሐ ሰቡት ኢመሸግ ዐደድ ሐለቱ እብ ሰብብ ርሐ ለሀድግ። ወቅሸሽ ወቅብዋር ለብዲቡ ሀገጊት በታተን ኢፈቱ፤

እብ ሰብብ ዐለት እሉ ወዘፈት እት ቀደም ፈርዑን እግል ልብጠር ተሐዘ ምኑ ምን ገብእ። ለከበር እት ኩሉ እግል ልብጸሕ እሉ ልትሸነህ። ፈርዑን ምነ ዐበ አስክለ ነሐሽ ወክሎም መለልሂቱ ወእት ሐን ረአሱቱ ለከድሞ ኩሎም ለከበር ክም ሰምዕዎ ወዴ። እሊመ ኢከፍዩ ከእግል ናፈ ወኹነ ወደደፍ ክም እለ ልብሎም፡- “ህዩ እሊ ከበር በኪት እግል መለልሂትኩም ሓክወ። ወክም እለ አቡኩም እብ እክላስ ወሸቅል ወወቅልት መቅደረት ለበጽሐየ ደረጀት እግል ትብጹሐ ህዩ ምን ንእሽኩም እት እንቱም ትባደር” ልብሎም፤ ምናተ ህቱ ክል ዶል እናስ በኪት ወከብዱ ባርሀት። ርሐ እኪት ለተአቤ። ወቀጽቡ ጠረፍ ንሳሉ ለኢልትዐዴ ዐለ፤

ዛያመ እሲት ወለት አርበዐ ሰኖታት ገበአት። ምናተ እለን ሰኖታት እለን ብዙሕ ትምቱማተ ይዐለዩ። ጀላል ግርመተ ወዐቅለ ወፍድብናህ እተ አነኮ ዐለ። ጸንት ወሺመት ምነ ለኢልትቀየረ ጠባይዐ ገበአዩ። ሮሻን ብሻውሮ እት ደይር ለልርእየ እለ እሲት ካርደ ለሸቃላይ ወከዳሚት ረደ ዴዲት ለዐለት እሲት ኢትመሰሉ። ህታመ እብጀሀተ እሊ ለናይ በዲር ሐያተ እት መቀማጥጥ ርሰዴ እንዴ ጣዩመቱ በታተን እግል ኢትፍቀዱ መገገአት ዳብአት ምኑ

ተመህ ቀደር



ዐለት። እሊ ህዬ እብ እለ ናይ ሰልፍ ለውቀተ - እሙመት ደደፍ እግል ትትመተዕ ምን ሐዜት ሌጣ ቱ። አማን ተሐይሰ ምን ክትርመ ትርሕም እቱ ወትፈትዩ ዐለት ሰዕ ሸሀር እት ርሕመ ለረፈዐቱ ትመሰል። ወሰኔቱ እት ተሐዜ እንዴ ዐበ ምለዐል ሰናቱ እንዴ ገበአ ልወቅ እት እንቱ እግል ትርአዩ ትተምኔ ዐለት።

ኹነ እተ ወቅት ለሀይ ዲብለ ውቁል ተዕሊሙ ገጽ ቀደም እሲሩር ዕለ። እት ቀደሚሁ እምበል ሰለሰ ናይ ተኸሱስ ሰኖታት ሐቲመ ታርፍ ምኑ ይዐለ። ለመንደላይ እብ ጠቢዐቱ መሰጠር እሊ ኮን እግል ለአምር ወልድረስ ለሐዜ ሰቡት ዐለ። ከህኑት እግል ልድረስ ሰቡት ሐረ ዲብ ድራሰት ላሁት እግል ልትፈረር ቀረረ። ምናተ ለመስአለት እት ሕርያኑ ሌጠ ለተአተንክብ ይዐለት። በህለት ከህኑት ዕልም ሰኒ ዋሰዕ ወቅዙር ሰቡት ቱ ዲቡ እግል ልእቱ ለለሐዜ ደረሳይ - እት ረአሰለ ውቁል ድራሰት ወለ መጃላትለ ተኸሱስ - ዲብ አሮት ናይ ውቅልት ድራሰት መዕሀድ እግል ገሌ ሰኖታት ለልትሀየቡ ዝርያይ ወዕልምያይ እኽትባራት እብ ደረጀት ፈድብነ እግል ልትዐዴ ዐለት ዲቡ። ኹነ ዲብ ወቅት ድራሰቱ እብ ለአርእየ ለዐለ ለባበት ወፈጣነት ወሕሙድ አደብ ለጠለቡ ከብቱ ረክበ። ምን አቡሁ እምበለ ዕክት ክርኑ ሐቲመ ናሰእ ይዐለ። ለገርባዩ ሃምር ወቀጠናይ ዐለ። ምን ቃብል እግለ ልርእዩ ሰኒ ሸሉጥ መሰል። ለሰፋቱ እብ ፈርሀት ረቢ ወሕሸመት አዳም ትትአመር ለዐለት ዋልዳይቱ ለአትፋቀደከ፤

ናፈ ሐሁ ላቱ እብ ዐክሰ እሊ ዐለ። ምን አቡሁ ለርሹድ ገርቡ ወለ ገጹ ምሉእ ወየም አለቡ ምነ ጠባይዑ ዋርሰ ዐለ። ሰኒ መትድኣላይ ወልወቅ ዐለ። ወበክቱ እንዴ ሰነ መማኒትለ ገርቡ ምን መማኒት ገርብ አቡሁ ለዕኩክ ወክቡድ ህቱ ካብ ቀልል ዐለ። ለመንደላይ ለትወቀለት ሸሃደት ረስም ወሰወሮት ትከቡተ። እብ መሳዐደት ዋልዳዩ፤ ዲብ ሻርዕ ሰንፍሮ - እሊ አሮት ምነ አግደ ሙህሚን ላቶም ሸዋርዕ መዲነት መነፍ ቱ - ሐቱ ቤት ትዛቤ። አነን ሸቅሉ ወነታጅለ ዐመሉ ለለአትዐፊ ዲብ አነን ወደየ ወእብ ግሩም ኸዋ ሄሮግሎፍየት “ናፈ ወድ ብሻውሮ፤ ኸሪጅ መዕሀድ ኹፋ ናይ ፍኑን” ለትክተብ ዲብ ላፍተት እንዴ ሰቅለ እተ፡ እብ ሰብር እሊ ሸቅሉ ለልትሸነህ ዐማዊል ልታኬ ወልትሐለም ዐለ። ጃሙርካመ ምን እሊ ውዳይለ ዘመን ኢደሐኩ ዐበ ወሰኒ ገዘፈ።

ወለ ጭቀሩ ለጸሊም ለገጹ ተሐት ለአድረዋሬ ዐለ ሐጭረ። ላመ ሐለቱ ወለ ደቅቡ እተ ገጹ ልትአመረ ዐለዩ። ለአረጊቱመ አክል አዩ ቃሲ ወክለም ክም ቱ ለአሰእለ ዐለ። ላመ ክርኑ ሰኒ ተሐደደት ወዐከት። ዶል ለእለ ነብሕተ ለክርኑ ቃሎት ውቅልት ሰቡት ትወዴ ለከራዊ ወለ ሐሻይል ወለደመሚት አልባበን ነስእ ዐለ። ወእግል ኩሉ ሴምዓዩ ዒቅባይ ሮሻን ሙፈትሸለ ሀረም ፋዝዕ ክምሀለ ለዐልን ዐለ። ምናተ ምስል እሊ ኩሉ ቀሳውቱ ወደቅቡ። እግለ መንባሁ ወፈታዩ ደደፍ ላቱ ምን ውልዋል ለሐምል ዐለ። ለምን ዘመን ንእሾም ዐለት እሎም ምስንዮት ሰኒ ወአማን እት ትተረድ መጸት። ነቅመዩ ምን ገብእ እብ ሰዐይ መጹ ወአመረዩ ምን ገብእ ጸይዑ ወነሀረዩ ምን ገብእመ ረውግ ወለሀድእ። ወምን እሊ ወኬንመ እብ አልባቦም ልትፋህዋ ወምራድ አሕድ ደሉ ዐለው። ደደፍ እብ ምልሃሁ እት ልትጫፈርመ ዔረ ምን ገብእ ጃሙርክ ልሸዕር እቡ ወእብ ሰዐይ ልትከቡቱ፤ እት ከብዱ ለህሌት ምን ለዐል ለገበአ ቅሩቡ ህቱ ለአ'ምረ ዐለ። ሙብሱጥ ክምሀለ አመረ ምን ገብእ ልትሳረር ዲቡ ወልትዳከክ እቱ። ወትዕብ ወማሸግ እት እንቱ መጸ ምን ገብእመ ሰቡት ልፍህሙ እብ ምልሃሁ እተ ቀደሙ እንዴ አግሐመ ዘነቡ ለሻልሽ እሉ ወእብ ረሕመት ለአትቃምቱ።

ደደፍመ ግድም ወድ ዐሰር ክልኤ ሰነት ገበአ። ላመ ወቅት ለገበይ ለዲብ እለ እዲነ ነሰእ እግል ልሕሬ ዲቡ ወጅቡ ተመ ሌጠ፤ አማን ተሐይሰ ቀዴማይለ መደት እለ እብ ክሰሱ እለ ሰኒ ከጠር ላተ መስአለት ሓሰበ ወሽቁልመ እብ ይዐለ። ዓመተን ላቱ እት ክል መዋዲቱ ሐምዴ ለአስትህል ዐለ። ኹነ እብ እት ፈልሰፈት ለአርእዩ ለዐለ ፈተ ሰቡት ትቀሸሽ እምበል ከህኑት ካልእ ለሐሬ መሰሉ ይዐለ። ምናተ ናፈ ላቱ - ምን ሐረሰ ወኬን ለአቀምት ሰቡት ዐለ - እት ለሐምብስ ወእት ልትሳሰዴ ወእት ሰሰዕ ክለ ረአዩተ ወለዕበያቱ ወለ ክምክምት ሓለቱ ክለ ረአተ ልባስ ዐስከርየት እንዴ አልበሰዩ እት ልትነዩሉ “መስሉ ለአለቡ ዐስከሪ ቱ!” ልብል ዐለ። ምን ቅያሰ ወለዐል ልትፋተው ሰቡት ዐለው ናፈ ለልቡሉተ እምበል ሐቱ ክልኤ ልትከቡተ ሰቡት ዐለ። ደደፍ እለ ናፈ ለመርሐዩተ ገበይ ሐረ። ዛያመ ርይሕት እት እንተ ባረከተ እሉ። ምነ አምዕል ለሀ ወሐር እተ አውቃትለ ዓያድ እግል ዛዩ አክለ ጅኑድ ወለ ፋራሰ ወፈሳይለ ጃሽ

ለበሰጠ ጋር በታተን ኢዐለ። ብሻቅሮ ህዬ እ'ለ ልሕሬ መሉህ ከበሩመ ናሰእ ይዐለ። እግል ኹነ ወናፋመ አሮቶምተ ከገበይለ ሙስተቅበሉ እትለሐሬ ድ'ኩል ዲቦም ይዐለ። ምናተ እት ለአስተንትን ወእብ ምልሃሁ ለገዛፍ ከርሹቱ ዲብ ጣሰሰ - ኩሎም እብ ሕበር እተ ናይ ወቅት ሐጋይ ቃዐት ግሱያም ዐለው - እግል ደደፍ ክም እለ ቤለዩ፡- ደደፍ፤ ደደፍ ለአስክ ማሌ ቅሩብ ታክብ ለዐለ ቱ እሊ! እናስ

በዐል መስኡልየት ገበአ ከእብ ሐራን ዲብ እለ እዲነ ለነሰእ ገበይ ረአሱ ለአደውር ሀለ። ለዘመን ሰኒ ኢትኬለመ ገብእ። የሀ ዘመን ዲብ እሊ ብሻውሮ ሰኒ ወአገርም። አሰክ ለሀረም እተ ካትመቱ ለአበጽሕ እብ ልዋፍክ ወሰትርክ ታለዩ። አሮ አነኮቱ ለደብእ ትረክብ ኢመሰለኒ። ዛያመ እብ አንክረ ሸንሀተ ዲብ ተአሰእል ክም እለ ትቤ፡- ብዙሕ ሱኣላት ኢተአብዞሐ። እሊ ግሩም ገጽ ደደፍ ወለሮማይት ብዋረቱ ወእሊ ሰኒ መማኒቱ ለልርኤ እግል ሐቲመ ዶል ትግበእ ዛብዋ ምነ ዙባዋ ዐጀላት ፈርዑን ኢረኤኮ እንዴ ቤለ ሸክ ኢወዴ።

ተብሰም

• ምሮት ሰኒ ህኩይ ላቱ ነፈር ዐለ። እሲቱ እግል ተአትጋዴ ሱግ ጌሰት። ሱግ እት ገይሰ መፍቱሕ ለቤት ትረሰዐቱ። ከዶለ ዕቅባለተ እግል ልፍቶሐ እለ ለባብ ከርከሐት ዲቦም። ህቱ ህዬ ክርንለ ባብ ክም ሰምዐ እግል ወልዱ እንዴ ነቅመ “ቅነጽ ለባብ ፍትሐ” ቤለዩ። ህኩትለ ጀናመ ምንተሐት ህኩት አቡሁ ሰቡት ይዐለት። አቤኮ ቤለ ወእተ ምትክራሩ ትባለሰ። አዝመ ምኑ ወእግለ ወለቱ እንዴ ነቅመ ቅነጹ ለባብ ፍትሕዩ” ቤለዩ። ህታመ አቤት እሉ። ማን ወገለብ ትዋለቤ። እት ደንጎበ ምነ ምትክራሩ እንዴ ኢቀንጽ እግል እሲቱ፤ “የሀይ ወለት ሰብ ምን እለ ዮም ወሐር እንቱ ሕድግት ህሌኪ” ቤለዩ ንብለኩም። ከረቢ ልነጃኩም። ህኩት ለአክ ሕማም ቱ። ወበዲርመ “ህኩይ ሐርኡ እብ ፍሽይ ለአክልሱ” ቤለው ሰብ መሰል! ከእሊመ አዜ እንዴ ቀንጸ ለባብ እግል ኢልፍተሕ እሲቱ ሐድጎ፤ ሸር ህኩት ልክለአነ!



ኤባብ

ለዐባይ ምክር!

ምሮት ነፈር ዲብ አል እማም አል ሻፊዒ እንዴ መጹ፤ ከነብር እተ ለሀለ ሓለት ሕግላን ወሀቱ ሸቃላይ ክም ቱ ወእት አምዕል ሐምስ ደርህም ክም ረክብ፤ ወእለ ዮምየቱ ወለ ሐቱ ክም ኢትደብእ እሉ ደግመ እሉ።

አል እማም አል ሻፊዒ እለ ክም ሰምዐ እግለ እናስ ዲብ ለአሸቄክ ለሀለ ነፈር እንዴ ጊስክ ከለ ዮምየትክ ምን ሐምስ ደርህም እት አርበዕ ደርህም እግል ልብለሰ እከ ትሰአሉ ቤለዩ።

ለእናስ ለመስአለት ወለ ምን ኢፈሀመያመ ህቱ ላቱ ህግያለ እማም እንዴ ሰምዐ ክመ እለ ትበሀለ ወደ። ሐቆ መደት ለእናስ ዲብ አል እማም አልሻፊዒ ምን ሐዲስ እንዴ አቅበለ ክም እለ ቤለዩ፤ “ሼክነ አነ ለሓለትዬ እተ አነኮ ህሌት ወለ ሐቲመ ኢትበደለት ዲብ” ቤለዩ። ህቱ ህዬ ዲብለ ዐሚሁ እንዴ አቅበለ ከለዮምየቱ ምን አርበዕ እት ሰለሰ ደርህም እግል ልክረዩ እሉ እግል ልትሰአሉ መክረዩ።

ለእናስ ሰኒ ፍኩር እት እንቱ ዲብለ ዐሚሁ አቅበለ ወክመ አል እማም አል ሻፊዒ ለቤሉተ ወደ። ሐቆ መደት ለእናስ ዲብለ እማም እንዴ አቅበለ ከዲብለ እለ ሀበዩ ምክር ብዙሕ ሐመደዩ ወለ ሰለሰ ደርህም ክሉ መሓግዙ እንዴ ባልሐት ሐቆሁመ ተአተርፍ እሉ ክም ህሌት አሰአለዩ፤ ምናተ ለመስአለት እግል ልፈሰረ እሉ ጠልበ ምኑ። ለእማም ህዬ ክምእነ ቤለዩ፤ “ለሸቅል ለእሉ ጽብዋ ዐልከ ምን በዲሩ ምን ሰለሰ ደርህም ወለዐል ለአስታህሉ ይዐለ። ለክልኤ ደርህም ለምንለዐል ትትከቡተን ዐልከ ምን ሐቅከ ሰቡት ይዐለዩ። እተ ማልከ ክም ተሓበረየ በርከት ከልኢያሁ፤ ከሐራም እት ሐላል ተሓበረ ምን ገብእ በርከት ለአሰእኑ ወሸቲተት ወድዩ” ቤለዩ።



አዜመ እግል ኩሉ ዱልያም!



ሕርየት ኤረትርዮ እላተ 32ይት ሐላ አዶረት። እሊ እብ ዕልብ ሰነዋት ብዙሕ መስል ገብኤ። እግላ እግል መደት ዘመናት ዲብ ሐንቴ እስትዕማር ለጸንሐት ዐድነ ላኪን ብዙሕ ኢኮን። ለትመጽእ ዮም 24 ማዮ 2023፡ ዲብ ዐድ ወካርጅ ለልትረከብ ሽዑብ ኤረትርዮ “ምስትንክር ሄራር ሰባተት” እበ ትብል ሰቅራት፡ እብ ሐቴ ንየት ወሀንደገት ኦሮት ልብ፡ እብ ሕበር “ዐድነ” እግል ሊበልቱ።

ዮም ዓመት ዒድ ሕርየትን፡ እግላ እብ መናሰበት ገሸለት

ሕማም ኮሮን ቫይረስ እትኩሩም ለዐለ ነባሪ ወለመድ መናሰባት ዓያድኹ ዲበ ናይ በዲሩ ሰበት አቅበል፡ እግላ ሐንቴለ “ምስትንክር ሄራር ሰባተት” ለትብል ሰቅራት ለአትዳለዩ ወራታት፡ ምን ዮም 24 ወራሕ 4፡ እበ ለሄራር ለአምበተ ወሽዕለት ሕርየት ለበደለ “ካስ ህያብ ሕርየት” እንዴ አምበተዩ፡ አስክ ዮም 24 ማዮ ዲብ ኩሉ አቃሊም ዐድኹ እብ ምድር፡ እብ በሐር ወእብ ጀው እንዴ ለሄርር፡ ሕሽመት ወቀሎት ታርክ ለረፍዐት ልእከት እንዴ

ለአትሐላል፡ እበ ምን ጽባብሐት ለተለመ ወእግል ልብጽሐ ለትፈረገ ሄራር አስክ አካናት ታርክ እንዴ አምበተ፡ ለሄራር አስክ እለ ለአተላላ ሆለ።

እምበል እሊመ እብ ኩሉ ሽዑብ፡ አጅህዘት ሕኩመት ወጀብህት፡ ልጃን አትመቃርሐት ዓያድ ወጠን፡ ለገብእ ጅህድ ድቁብ ፈናኔን ዐድኹ ዓያድ ወጠነ እግል አግመሎት ወአገረሞት ለለአርእወ መሻረከት ፈን ወፍጥር ዮመ ክም በዲረ ዲብ አካነ ህሌት። ፈን ኤረትርዮ ዲብ

ወራታት ብናእ ወዐማር ወጠን፡ እት ከሊቅ ፍካር ፈሀም ሕበር ወደቅቡ ለጸንሐት ወለህሌት ተረቱ ሰኒ ዐባይ ተ። ዲብ መደት ግድለ ታሕሪር ወሕፍዘት ሕሽመት ሲያደት ወጠን፡ ፈን ኤረትርዮ፡ ጅንሰየት፡ ወጠንዮት፡ ወሕደት ወሐበን እብ ዕጹፍ እንዴ አደቀቡ፡ ታእሪክ አሰል፡ ዓዳት፡ ነባሪ ናይር፡ ሚራሰ ለትፈናተ አርዛቅ ወጠን፡ እበ ለፈይሐ ቅያሱ ክም ልተረድ ወገርም እንዴ ወዴ ጸንሐ። ምን እሊ መብዓእ ወተፍኪር እሊ ለትበገሰ፡ ዮም ዓመት ዲብ 32ይት ሰነት ሕርየት ኤረትርዮ፡ እግል ልትቀደም መትዳላዩ እንዴ አታመመ ለመናሰበት ቃልየት ልትጸበር ሀለ።

ክምሰለ ታእሪክ ለልሽህ'ደ፡ ክም አሪትርዩን ፈናኔን፡ መቅደረቶም፡ አምሮም ወፍጥርም እግል ክድመት ሽዑብ ወወጠን ለሰበለው ፈናኔን ዲብ ዐለም ህለው እግል ልትበህሎ ኢልትቀደር። ፈናኔን አሪትርዩን ስለሕ ሐርብ እግል ሕርየት ወሕሽመት መዳፈዐት ወጠን፡ ወፈናኔን አሪትርዩን ርሽመት ናይለ ዲብ አባይነ ለእንወርውረ ለኢትምሕክ ኮናት ብቅዕት እንዴ ገብአው፡ መራሕል መሪር እብ

ዐውቱ እግል ንትዐዴ፡ ዲብ ባልሐት ሰለሰል ወአልጅመት መስታዕምረት፡ እግል አርሀዮት መስደድ፡ ወእግል ገልጸጾት ጽልመት ዘመናት ለተሐብን ወለተአሸንን መሻረከት እንዴ ወደው፡ እብ በሰር ወራታት ፈን ወፍጥር ውሕደት ወጠንዮት ወመትክምካም መዋጥኒን ዲብ ኦሮት ሀደፍ እንዴ ከልቀው፡ ሰብተው ወአስበተው፡ አትአመነው ወተአመነውክ ምለዐል ኩሉ ገብአው። ሐምዴ እግላ ዲመ አምሮም ወመቅደረቶም ዲብ መንፈዐት ሽዑብ ወወጠን፡ ዲብ ሀደፍ መክሰብ ሕበር፡ ተቅዩር ዐባት ወዲብ አትመሞት ሀደፍ ሕርየት እቅትሳድ ለአውዐለው ገዳይም ወሐዳይሱ ኬትብት፡ ሙላሕኒን፡ ሽዑራእ፡ ረሳሚን፡ መስውሪን፡ ሙመሰሊን፡ መተልህየት፡ ሙሲቅዩን ወብዕዳም ፈናኔን ዐድኹ፡ ሐምዴ እግላ እግል አውርሐት እብ ለትወቀለት ደረጀት እምበል ዕርፍ ላሊ ወአምዕል ለሸቀው ሰብ መቅደረት ፈን ወደረሰ፡ አሌላት ዒድ በኪት ወሰዒድ ሊደዩ እግልነ። ክሊነ እተ እለ ህሌን ምን ነህሌ፡ ሰቅራትን፡ “ምስትንክር ሄራር ሰባተት” ትግባእ።

ሕርየቹ ትከፈኒ

ሕርየት መሰለ አለቡ፡ ሰፍሩይ ዲብ እንታመ ሕርየት ሐቆ ብከ ክሉ ብከ፡ ጽጉብ ዲብ እንተ ሕርየት ሐቆ ሐገልከ ላኪን ክምሰል ይህሌክ እንተ። ከሐቴ መደት ኦሮ ከልብ ሽሉሕ ዲብ ለአንገዋ፡ እት ገበዩ ኦሮ እሉ ለኢመሰል ከልብ ርሹድ ጸንሐዩ። ከልብ ለሽሉሕ ህዩ ዲበ ሕውዝ ከልብ እንዴ አወለጠ ምሰለ ሕውዝ ከልብ መጃል ህጅክ አንበተ። መጃለ ህጅኮም ህዩ ክእነ ዐለ።

ከልብ ሕውዝ፡ በገ መናበትክ ሐቆ ክእነ ገአት፡ ክምሰልዩ እግል ትትረሽድ ወተሐውዝ አነ ወእንተ ንትባደል።

ከልብ ሽሉሕ፡ ሰኒ እግል ንትባደል እንቀድር፡ ምናተ እንዴ ኢንትባደል እግል እትሰአለኩ፡ እለ ዲብ ስጋድክ ተሀንጦጥል ለህሌት ከረፈተት ናይ ሚ ተ?

ከልብ ሕውዝ፡ ላላእ ላላእ ላላእ፡ እንተ ሐቴ ኢትአምር።

ኖሼመ፡ ሐቆ ፈትሐኒ እግል ህረብ ምኑቱ ማሚ! በስ አዜ ሐሰብከ እንተ ክእነ ክምሰልዩ እግል ተሐውዝ ወትትረሽድ ነዐ በድሰኒ። ክም ምራድክ ትብሌዕ ወትሰቴ። ሕኔት አከይ ሕብር ትትሐበር ህዩ ክእነ ክምሰልዩ ተሐውዝ ወትሰኒ።

ከልብ ሽሉሕ፡ ሄሄሄሄ!----- እንተ እግል ትትሐረር እንዴ እቤ እነ እግል እትሰጀን ሐዜከ? አነ ላተ መግህፍ ነብረ አለብዩ እምበል መግህፍ ሕርየት



እለ ከረፈተት ኢኮን። መንባዩ ለልአሰረኒ እቡ ሐብል ቱ። ላሊ መንባዩ እግል ይህረብ ምኑ እትለ እለ ትርኤ ህሌከ ግርም ዘሪበት እብሊ ሐብል እንዴ አሰፊ፡ እሱር ዲብ አነ እትመዩ።

ከልብ ሽሉሕ፡ ከበለኒ ላሊ ወአምዕል እሱር ትውዕል ወትትመዩ?

ከልብ ሕውዝ፡ አይወ

ወዓፍየት። አዜ ህዩ ርሽድክ ሽፈ እግልከ። አነ ህዩ ሕኔት እግል ሰገ ወዓጭም እትከራብን ሕርየቹ ትከፈኒ።

ከእብሊ ሕርየት ወእግር ጥልቅት መሰለን አለቡ። ሕኔት ጽጋብ ወእሰር እገር ጥሉቅ ልትፈደል።

ዒማት፡ ክታብ እፈ

ጆላ ሕርየት


ረዩም ሄረርን እግላ - ዘበን እብ ዘበኑ
ካዩድናሁ ለህደም - እብ አሸዋኩ ወእበኑ
ጽምእ ከህልነ ወሰፍረ - አምዒት ልሽህድ ለጋኑ
ምን ልትረሰቡ ስሙም ጋዝ - ለትነሸዐነ ተናኑ
ወምን ልትረሰቡ ለብርድ - ለገርብ ካርፍ እብ አካኑ
ወምን ልትረሰቡ ለትርሃን - ምሰል ቀጽ ወክታት፤

ሕነ ጆላ ሕርየት - ሕፍን ከህልነ ወመራር
መቅጠን ዕሩቅ ዲብ እንቱ - ጽምእ ከህልነ ወክእር
እግር ትጊት ዲብ እንተ - ወእት ልጋደእ ለአጭፋር
ሓለፍናሁ መሻዊት - ልሽህድ ክተፍ ወአስራር፤

በጽሕ ገብአ ሰድቀተ - ሽምብሬብመ እብ አካነ
ጽልመት እግል ትትገልጸጽ - ወሽመት ለናይ ወድጋነ
ክሉ ሕበር ናደለ - መልዒት አዱግ ወእንሳነ
ብርድ ላሊ ከህልነ - ወትርሃን እት ረአስ ክዋነ፤
ጆላ ሕርየት ወአማነት - ለህይ ከለህይ ምን ትፋነ
ወሸሂድ ቤዘ ምን ገብአ - ለአርደት በዐል አማነ
እበ ረሄት ሰድትነ - ከዐድነ ረኤነ ብርሃነ፤

እት ጀላበ አዜመ - ሕነ ሐቴ ይእንጠምዕ
ዲበ ለመጸአነ - ነዳይቱ ነአደምዕ
ኢትትሰውሴ ሕርየት - ምን አድማይናቱ ትለምዕ

ሲያደተ ንዕቀብ - ኢተምቱመ ምን ጀፈር
እግል ዐባት ወዒቅቢት - ኢንትህኪ ምን ሰፈር
ሕርየትተ ጀላልነ - ንዕቀብ እብ ሕበር



ፍረቅ ባስኬት-ቦል አለና ወሳዋ ካስ ሕርየት ነስአው



እብ መናሰበት 32ይት ሰነት ዒድ ሕርየት እት ፍንጌ ፍረቅ አዋልድ ወውላድ አቅሊም ምግብ ገብእ ለአስመን ጅግራታት ባስኬትቦል፡ ለሐልፈት ሰንበት 14 ማዮ ብዝሓም ፈተኛ ርዶደት እተ ሐድረወ መናሰበት እት ሜዳን ቦቻፊላ አስመረ ተመ።

እትሊ ናይ ተስፍያት ጅግረ አውደቀት ከሐሊፍ፡ እት ካስ ነሃየት ፍረቅ አለና ወደነን እብ አዋልድ ወእብ ውላድ ህይ ፍረቅ ሳዋ ውሓሬና ቶም ዲብ ነሃየት ለበጽሐው። እስልፍ ለተልሀው ህይ ፍረቅ አለና ወደንደን ዐለው።

አለና ህይ እብ ጨባብ ፍገራት በህለት እብ 30ኣብ28 እት መትጃግራዩ ፈሪቅ ደንደን ሰበት ተዐወተ፡ ሀርመ ናይ እሊ ዒድ ጋብእ ሀሊ። እትለ ትልህዩ መተልህየት አለና ላተን ፊሸን ኡብረሃም ወፍሬወይኒ ተስፋይ ለሐስ ሐረካት እት ለአርእዩ፡ እት

ዐውቲ ፈሪቅን ዶር ውቁል እግል ልተልህዩ ቀድረዩ።

ለብዝሓም መአክይደት ወፈተኛ ርዶደት ልታኸወ ለዐለው ትልህዩ፡ እት ፍንጌ ፍረቅ ሳዋ ውሓሬና ለገብአት ዐለት። እለ ትልህዩ ልሰዕ እንዴ ኢትኣነብት መአይደት ፈሪቅ ሳዋ ፈሪቁም እግል ልሰጅዶ እበ አርአዉ ሕፋን ርዶድያይ ሐረካት አትናያት ሰኒ ሐፍነት።

ክልኢቶም ፍረቅ ህይ ድቁብ ርዶድያይ ርሕ መጃገረት ቱ ለአርአዩ። አክረቱ ህይ፡ እብ መደርብ አቤል አፍወርቂ ለልትደየሮ መተልህየት ሳዋ መአይደቶም ይአክጃለው።

እት ረአሰለ ዮሴፍ ንጉሴ ለመርሕም መትጃግራቶም ላቶም 65ኣብ56 እት ልትዐውቶ፡ ካስ ሕርየት እግል ልትሆገሎ ቀድረው። እትለ ትልህዩ ድቅብት

መተልህዩይ ፈሪቅ ሳዋ ዳንኤል ዘምህረት ሕምድት ትልህዩ ለአርኤ ዲብ ሀሊ፡ ወድ ፈሪቁ እስራኤል ሙሉጌታ 27 ንቅጠት እብ ሰጅሎቱ ዝያድ ኩሎም መተልህየት እግል ለአሽብርቅ ቀድረ።ቀደም እላመ እስራኤል እግል ፈሪቁ ሳዋ ንቀዋ እት ሰጅል፡ እት ዐውቲለ ፈሪቅ ሐዞት ዛይደት ለአገዴ ሀሊ።

እት ደንጎበ ህይ፡ ዕዉት ፍረቅ ለትዳሉ እሉ ጀዋእዝ ካስ ወመዳልያት ምን እዴ መስኡል ፈሬዕ ርዶደት አቅሊም ምግብ አሰይድ ክፍሌ አብረሃ፡ ርአስ ወጠንያይ ፈደሬሽን ባስኬትቦል ኢንጅኔር ሄደክ አሚኔ ወብዕዳም መስኡሊን ትክበተው።

ወድ 34 ሰነት ጋብእ ለህለ ዛሺ እተ መጽእ ምውሰም ላሊጋ ምን በርሰሎና እግል ልትሳረሕ ክምሰል ቱ እት ለአትአምር፡ ታሪካይ ዐውቲ እንዴ አትረፋ ቱ እግል ልትሳረሕ።

ባርሰሎና ብሌተ ሻምፕዮን ላሊገ ትከደነ

ሲፓንያይ ፈሪቅ በርሰሎን ሐቅ ምውሰም ርዶደት 2018/2019፡ እግል ሰልፍ ኢነቱ ካስ ላሊጋ ሀረሰ። እሊ ፈሪቅ ለሐልፈት ሰንበት ዐባይ አስክ ሜዳን ሲፓንዮል እንዴ ጌስ 4-2 እንዴ ቀልቡ ልሰዕ አርበዕ ትልህዩ ታርፋቱ ዲብ ህለያ ቱ ሻምፕዮን ክም ቱ ለአከደ።

ሮበርት ልዋንዴውስኪ (ክልኢት)፡ አሌያንድሮ ባልዴ ወጁልዩስ ካውንዴ በርሳ ሻምፕዮን እተ ገብእ ዲብ ትልህዩ፡ አግዋል ለአተው ዐለው። ፈሪቅ በርሳ 12 ንቅጠት ሌጠ እተ ታርፋቱ ለህለዩ ጅግረ ላሊጋ 85 ንቅጠት እንዴ አክእለሉ፡ እግል ደርቡ ለህለ ፈሪቅ ርዶል ማድሪድ እብ 14 ንቅጠት እንዴ ሐልፋ ቱ ሻምፕዮን እድሙን ለህለ።

መደርብ እሊ ፈሪቅ ዛሺ ህይ እት ኖቨምበር 2021 ዲብ ኑ ካምፕ እንዴመጽኦ ክእነ መስል ዐውቲ ጃቀፎቱ፡ ምን ለትፈናተው መሐልሊን ርዶደት አርብ ሐምዴ ዛይደት ራክብ ሀሊ። ዛሺ ፍሌንየት ፈሪቅ በርሳ እበ ምነ ተልህዩን 17 ሰነት፡ ሰምና ኢነት ካስ ክም ነስኦ፡ ሰጅላት ኮበራት እግር ሰፕይን ለአክድ።

ክም መደርብ እንዴ ገብእ እተ ፈሪቅ ክም አቅበሉ፡ በርሳ ሰእነ ለዐለ ሕሽመት እት አካነ እግል ልብለስ ሰበት ቀድረ ህይ፡ እት ታሪክ ኮበራት እግር ናይለ ፈሪቅ ሰፍሐት ፍንቲት ፋቴሕ ሀሊ።



በርሰሎና እት መደት ፈርሐቱ ለአቀብል

ፕሪመርሊግ እትለ ሳምን

ለድቁብ ፍረቅ ፕሪመርሊግ እንግሊዝ እትሊ ለሐልፈ ሰነብትመ ትልህዩታቱ ዋዲ ዐለ። እትሊ እት ተምም መጽእ ለህለ ጅግራታት፡ ገሌሁ ፍረቅ በክቱ እንዴ ሰነ ቀልብ ከሰልሰለስ ንቅጠት እት ግፈቱ ከሬ ዲብ ሀሊ፡ ገሌ ፍረቅ ህይ፡ ቅልብ ገንሐዩ።

እት ዮም 13 ማዮ ምነ

ተልህ ፍረቅ አሰቶን ሺለ እግል ቶተንሃም 2-1፡ ክሪስታል ፓላስ እግል ቦርኔማውዝ 2-0፡ ማንቼስተር ዩናይትድ እግል ዎልቭስ 2-0፡ ወፋልሃም እግል ሳውዛምፕተን 2-0 እት ቀልቦ፡ ቼልሲ ምስል ኖቲንግሃም ፎሬስት ወሊድስ ምስል ኒውካሰል ለወደወን ትልህዩታት ህይ 2-2 ትፈናተው።



ማንሲቲ እግል ኤቨርተን (3-0)

ሰንበት ዐባይ 14 ማዮ ለገብአዩ ሰለስ ትልህዩታትመ፡ ብሬንትፎርድ እግል ዌስትሃም 2-0፡ ማንቼስተር ሲቲ እግል ኤቨርተን 3-0፡ ክምሰልሁመ ብራይተን እግል አርሰናል 3-0 ሳርሐምም።

ከሰቡረት ናይለ ውቁላም ሐምስ ፈሪቅ እለ ተሌ ተ፡
1, ማን-ሲቲ = 85 ንቅጠት
2, አርሰናል = 81 ንቅጠት
3, ኒውካሰል = 66 ንቅጠት
4, ማን-ዩናይትድ = 66 ንቅጠት
5, ሊቨርፑል = 62 ንቅጠት
ክልኢት መትጃግረት ለህለው ፈሪቅ ማንቼስተር ሲቲ ወአርሰናል ቶም ቅሩብ ሕድ ንቀዋ ለቦም ድኢኮን፡ ለብዕድ ፍረቅ እት ደንገረት ታርፍ ለህለ።



ፋልሃም እግል ሳውዛምፕተን (2-0)



ምስትንክር ሄራር ሰባተት!
32^ይ ዓ.ድ ሕርየት



ዲ.ዛይን - ታእዛዝ ኣብርሃ
ስወር- ኣርካይቭ ፌሬዕ ስወር